

孟河丁氏醫案

吳興

王君書







孟河丁氏醫案卷七

武進孟河丁澤周甘仁著

男元彥彙錄

孫濟萬編訂

濟華校讐

濟民

調經案

沈右 氣升嘔吐。止發不常。口乾內熱。經事愆期。行而不多。夜不安寐。舌質紅。苔

薄黃。脉象左弦右濇。弦為肝旺。濇為血少。良由中懷抑塞。木鬱不達。鬱極化火。火

性炎上。上衝則為嘔吐。經所謂諸逆衝上。皆屬於火是也。肝膽同宮。肝鬱則清淨

之府。豈能無動。挾膽火以上升。則氣升嘔逆。尤為必有之象。口乾內熱。可以類推

矣。治肝之病。知肝傳脾。肝氣橫逆。不得舒泄。順乘中土。脾胃受制。胃者二陽也。經

云二陽之病發心脾。有不得隱曲。女子不月。以心生血。脾統血。肝藏血。而細推營血之化源。實由二陽所出。經云。飲食入胃。游溢精氣。上輸於脾。又云中焦受氣。取汗變化而赤。是謂血。又云。營出中焦。木剋土虛。中焦失其變化之功能。所生之血日少。上既不能奉生於心脾。下又無以澤灌乎衝任。經來愆期而少。已有不月之漸。一傳再傳。便有風消息賁之變。蟻穴潰隄。積羽折軸。豈能無慮。先哲云。肝為剛藏。非柔養不克。胃為陽土。非清通不和。擬進養血柔肝和胃通經之法。不治心脾而治肝胃。窮源返本之謀也。第是症屬七情。人非太上。尤當怡養和悅。庶使藥達病所。即奏膚功。不致纏綿為要耳。

生白芍 二錢

硃茯神 三錢

仙半夏 一錢五分 川石斛 二錢

炒棗仁 三錢

代赭石 二錢 煨

旋覆花 錢半 包

銀柴胡 一錢

青龍齒 三錢

廣橘白 一錢

菟蔚子 三錢

丹參 二錢

鮮竹茹 一錢五分 生熟穀芽 各三錢

左金丸 七分 包煎

二診 氣升嘔吐未發。夜寐不安。經事行而不多。苔灰黃。按脉弦細而澀。皆由營血虧耗。肝失調達。脾失健運。胃失降和為病。昨投養血柔肝和胃降逆。助以調經之劑。尚覺獲效。仍擬逍遙合覆。赭二陳加減。但得木土不爭。則諸恙可愈。

白歸身 二錢

硃茯神 三錢

炒棗仁 三錢

炒竹茹 一錢五分  
生白芍 二錢

仙半夏 一錢五分  
青龍齒 三錢

廣橘白 一錢五分  
銀柴胡 八分

北秫米 三錢包

代赭石 三錢 煨  
芫蔚子 三錢

川石斛 三錢

旋覆花 錢半包  
青橘葉 錢半

李右 天癸初至。行而不多。腹痛隱隱。鼻紅甚劇。氣滯血瘀。肝火載血。不能順注。衝任而反衝激妄行。上溢清竅。有倒經之象。逆者順之。激者平之。則順氣祛瘀。清肝降火。為一定不易之法。

紫丹參 二錢  
淮牛膝 二錢

全當歸 二錢

粉丹皮 一錢五分  
鮮竹茹 三錢

芫蔚子 三錢

製香附 一錢五分  
白茅花 一錢 三錢 一粒包

炒荊芥 八分

福橘絡 一錢

春砂壳 八分

吳右 經事愆期。臨行腹痛。血室有寒。肝脾氣滯。血爲氣之依附。氣爲血之先導。氣行血行。氣止血止。欲調其經。先理其氣。經旨固如此也。擬嚴氏抑氣散。復入溫通之品。

製香附 一錢五分 雲茯苓 三錢

廣艾絨 八分

延胡索 一錢

月季花 八分

全當歸 二錢

菟蔚子 三錢

金鈴子 二錢

大砂仁 研八分

紫丹參 二錢

台烏藥 八分

淮牛膝 二錢

陳廣皮 一錢

鄭右 正虛邪伏。營衛循序失常。形寒已久。納少神疲。經事三月不行。漸成損怯。姑與扶正達邪。和營通經。

炒潞黨 二錢

抱茯神 三錢

菟蔚子 三錢

銀柴胡 八分

清炙艸 五分

紫丹參 二錢

月季花 五分

酒炒黃芩 錢半

陳廣皮 一錢

仙半夏 二錢

逍遙散 三錢包

二診 寒熱已止。納減神疲。經事三月不行。脉象弦數。客邪雖退。而正氣不復。衝



任虧損而經事不通。仍宗前法。

前方加淮牛膝二錢。西藏紅花八分。

翁右 經停九月。胃納不旺。經旨月事不以時者。責之衝任。衝為血海。隸於陽明。

陽明者胃也。飲食入胃。化生精血。營出中焦。陽明虛則不能生化精血。下注衝任。太衝不盛。經從何來。當從二陽發病主治。擬金匱溫經湯加味。

全當歸 二錢

阿膠珠 二錢

紫丹參 二錢

赤白芍 各錢半

川桂枝 四分

吳茱萸 四分

仙半夏 二錢

炙甘草 五分

芫蔚子 三錢

大川芎 八分

粉丹皮 一錢五分 生姜 二片

紅棗 二枚

徐右 經云暴痛屬寒。久痛屬熱。暴痛在經。久痛在絡。少腹痛陣作。痛甚有汗。已

延匝月。形寒納少。咳嗽泛噁。胸悶不舒。口乾引飲。肝熱瘀阻。氣滯不流。陰傷津少

上承。肺虛痰熱留戀。舌質紅絳。脉細如絲。虛羸太極。恐難完璧。

金鈴子 二錢

旋覆花 包錢半

硃茯神 三錢

赤白芍 各錢半

全瓜蒌 切四錢

光杏仁三錢

眞新絳八分

川象貝各二錢

焦查炭三錢

銀柴胡八分

失笑散包三錢

青橘葉一錢五分炒山梔一錢五分

二診 少腹痛已舒。泛噁漸止。有汗甚多。四肢逆冷。形瘦骨立。口渴欲飲。肝鬱化熱。熱深厥深。陰傷津少上承。肺虛痰熱留戀。舌質光。脉細依然。頗慮陰不斂。陽不藏。陰致有厥脫之變。皆由虛羸太極。不任攻補使然。

川石斛三錢

硃茯神三錢

川象貝各二錢

花龍骨四錢

烏梅炭八分

炒山梔一錢五分大白芍二錢

浮小麥四錢

生白朮一錢五分銀柴胡八分

紫丹參二錢

生熟穀芽各三錢

清炙枇杷葉三錢去毛包

柿霜八分

三診 厥復汗收。胃納漸進。佳兆也。形瘦骨立。脉細如絲。舌紅而絳。咳嗽泛噁。木鬱化火。肝病傳脾。陰傷津少上承。肺虛痰熱留戀。難經云。從所不勝來者為賊邪。雖見轉機。未足恃也。

前方去硃茯神紫丹參柿霜加生甘草五分陳木瓜二錢。

王右 適值經臨色紫黑。少腹脹痛拒按。痛甚有暈厥之狀。形寒怯冷。口乾不多飲。苔黃膩。脉濡濇。新寒外束。宿瘀內阻。少腹乃厥陰之界。厥陰爲寒熱之臟。肝失疎泄。氣滯不通。不通則痛矣。氣爲血之帥。氣行則血行。行血以理氣爲先。旨哉言乎。

肉桂心 五分

金鈴子 二錢

春砂壳 八分

青橘葉 一錢五分 小茴香 八分

延胡索 一錢

失笑散包 三錢

細青皮 一錢

菟蔚子 三錢

焦查炭 三錢

製香附 一錢五分 酒炒白芍 二錢

兩頭尖 酒浸包 一錢五分

另食鹽末 二兩

香附末 四兩

酒醋炒熨腹痛處

吳右

女子二七而天癸至。年十六矣。經猶未行。面色恍白。心悸跳躍。神疲乏力。

營血虧耗。無以下注。衝任使然。舌苔薄膩。脉象濡小無力。姑與和營通經。

全當歸 二錢

抱茯神 三錢

青龍齒 三錢

青橘葉 一錢五分 京赤芍 二錢

廣橘白 一錢

鷄血藤 二錢

月季花 八分

紫丹參 二錢

芫蔚子 三錢

嫩鈎鈎 三錢後下



孟河丁氏醫案卷七

崩漏案

丁右 血生於心。藏於肝。統於脾。肝脾兩虧。藏統失司。崩漏已久。邇來面浮足腫。納少便溏。脉細舌絳。此陰液已傷。衝任之脉失固。脾胃薄弱。水穀之濕不化。人以胃氣為本。陰損及陽。中土敗壞。虛象迭見。已入險途。姑擬益氣生陰。扶土運中。以冀陽生陰長。得穀則昌為幸。

炒潞黨參二錢

炙甘草五分

連皮苓四錢

生熟穀芽各三錢

米炒於朮錢半

扁豆衣三錢

陳廣皮一錢

炒淮藥三錢

乾荷葉一角

炒苡仁四錢

炒補骨脂錢半

羅右 崩漏不止。形瘦頭眩。投歸脾湯不效。按脉細數。細為血少。數為有熱。營血

大虧。衝任不固。陰虛於下。陽浮於上。欲潛其陽。必滋其陰。欲清其熱。必養其血。擬

膠艾四物合三甲飲。滋養陰血。而潛浮陽。調攝衝任。而固奇經。

阿膠珠二錢 生地炭四錢 大白芍一錢五分 左牡蠣四錢 廣艾炭八分

白歸身二錢 丹皮炭一錢五分 炙龜板三錢 炙鱉甲三錢 貫衆炭三錢

血餘炭二錢 鮮藕一兩切片入煎

李右 肝脾兩虧。藏血統血。兩臟失司。經漏如崩。面色萎黃。按脈細小。腰骨痠楚。

腰為腎腑。腎主骨。腎虛故腰痛而骨痠。茲從心脾二經調治。擬歸脾湯加味。俾得

中氣充足。力能引血歸經。

潞黨參三錢 清炙草五分 遠志肉一錢 固厚杜仲二錢 鹽水炒

紅棗兩枚 炙黃芪三錢 抱茯神三錢 白歸身二錢 川斷肉二錢

桂元肉二錢 甜冬朮一錢五分 炒棗仁三錢 大白芍一錢五分 阿膠珠二錢

藕節炭兩枚

錢右 衝任虧損。不能藏血。經漏三月。甚則有似崩之狀。腰痠骨楚。舌淡黃。脈細

澹心悸頭眩。血去陰傷。厥陽易於升騰。昔人云。暴崩宜補。宜攝。久崩宜清。宜通。因未盡之宿瘀。留戀衝任。新血不得歸經也。今擬膠艾四物湯。調攝衝任。祛瘀生新。

阿膠珠 二錢

硃茯神 三錢

大白芍 二錢

紫丹參 二錢

廣艾葉 八分

生地炭 四錢

大砂仁 八分 研

百草霜 一錢 包

白歸身 二錢

炮姜炭 四分

炒麥穀芽 各三錢

錢右 漏紅帶下。時輕時劇。便後脫肛。肛門墜脹。腑行燥結。腰腿痠楚。脉象虛弦。

氣虛不能攝血。血虧肝陽上升。擬補中益氣。調攝奇經。冀望氣能攝血。血自歸經。

生黃芪 三錢

白歸身 三錢

大白芍 二錢

全瓜蒌 切四錢

吉林參鬚 八分

硃茯神 三錢

稽豆衣 三錢

苦桔梗 一錢

清炙草 六分

炒棗仁 三錢

柏子仁 三錢

嫩鈎鈎

後入三錢 黑芝麻 三錢

松子肉 三錢

黃連二錢 黃芩二錢 黑玄煎二錢 煨子肉三錢

熟地三錢 蘇子三錢 苦杏仁一錢 附片六分 煨棗二三錢

白芍三錢 大白芍三錢 全瓜蒌三錢 苦杏仁一錢 煨棗二三錢

黃連二錢 黃芩二錢 黑玄煎二錢 煨子肉三錢 熟地三錢

蘇子三錢 苦杏仁一錢 附片六分 煨棗二三錢 白芍三錢

大白芍三錢 全瓜蒌三錢 苦杏仁一錢 煨棗二三錢 黃連二錢

黃芩二錢 黑玄煎二錢 煨子肉三錢 熟地三錢 蘇子三錢

苦杏仁一錢 附片六分 煨棗二三錢 白芍三錢 大白芍三錢

全瓜蒌三錢 苦杏仁一錢 煨棗二三錢 黃連二錢 黃芩二錢

黑玄煎二錢 煨子肉三錢 熟地三錢 蘇子三錢 苦杏仁一錢



孟河丁氏醫案卷七

帶下案

費右 營虛肝旺。肝鬱化火。脾虛生溼。溼鬱生熱。溼熱鬱火流入帶脉。帶無約束之權。以致內熱洩赤。腰痠帶下。溼熱下迫大腸。肛門墜脹。鬱火宜清。清火必佐養營。蘊濕宜滲。滲濕必兼扶土。

白歸身二錢

赤茯苓三錢

厚杜仲二錢

六一散三錢包

大白芍二錢

淮山藥三錢

烏賊骨三錢

炒條芩一錢五分

黑山梔一錢五分

黃柏炭八分

生白朮一錢五分

葶薺梗一錢五分

吳右 三陰不足。溼熱下注。帶下頻頻。陰挺墜脹。腑行不實。裏急後重。擬益氣升清。滋陰化溼。

生黃芪三錢

黃柏炭八分

小生地三錢

川升麻三分

蜜炙枳殼一錢

烏賊骨三錢 粉丹皮一錢五分 淨槐米三錢包 生甘草八分 苦桔梗一錢

福澤瀉一錢五分 威喜丸三錢包煎

黃石 營血虧。肝火旺。挾溼熱入擾帶脉。帶下赤白。頭眩腰痠。與養血清肝。化溼

束帶。

白歸身二錢 雲茯苓三錢 厚杜仲二錢 鮮藕二兩切片 生苡仁四錢

烏賊骨三錢 生白芍二錢 嫩白薇一錢五分 川斷肉二錢 黃柏炭八分

粉丹皮一錢五分 福澤瀉一錢五分 生白朮三錢 震靈丹三錢包

復診 赤白帶下。已見輕減。經事超前。營陰不足。肝火有餘。衝任不調。再擬養血

柔肝。而調奇經。

前方去白薇。加炙鱉甲三錢

孟河丁氏醫案卷七

胎前案

唐右 腰為腎腑。胎脉亦系於腎。腎陰不足。衝任亦虧。妊娠四月。忽然腹痛墜脹。腰痠漏紅。脈細小而弦。胎氣不固。營失維護。慮其胎墮。急擬膠艾四物湯。養血保胎。

阿膠珠二錢

生白朮一錢五分 厚杜仲二錢

大白芍一錢五分 廣艾炭八分

炒條芩一錢五分 川斷肉二錢

苧麻根二錢

白歸身二錢

生地炭四錢

桑寄生二錢

朱右 懷孕足月。漏紅迭見。是血虛有熱。衝任不固。胎之生發由於血。今血溢妄行。胎萎不長。不能依時而產也。宜養血清熱而固胎元。

阿膠珠二錢

生地炭四錢

白歸身二錢

炙黃芪三錢

苧麻根二錢

炒條芩一錢五分 嫩白薇一錢五分 大白芍一錢五分 西洋參一錢五分 藕節炭二枚

嚴右 咳嗽較減之後。忽然漏紅甚多。舌質淡紅。脉弦小而數。懷麟七月。正屬手

太陰司胎。太陰原有燥邪。引動肝火。由氣入營。血得熱以妄行。頗慮熱傷胎元。致

成小產。急宜養營泄熱以保胎。佐入滋水清肝而潤肺。

蛤粉炒阿膠三錢 生地炭三錢 側柏炭一錢五分 厚杜仲三錢

生白朮一錢五分 光杏仁三錢 冬桑葉三錢 炒條芩一錢 川象貝各二錢

冬瓜子三錢 鮮藕四兩去皮切片入煎 枇杷葉露四兩後入

蔡右 懷麟八月。腰痠漏紅。疫喉痧四天。寒熱不退。痧子隱隱。佈而不透。咳嗽泛

噁。咽喉焮紅作痛。舌質紅。苔粉白。脈象濡滑而數。風溫疫癘之邪。蘊襲肺胃二經。

兩兩相衡。自以清溫解毒為要。疫邪一日不解。則胎元一日不安。急宜辛涼汗解。

宣肺化痰。不必安胎。而安胎止漏之功。即在是矣。

薄荷葉八分 苦桔梗一錢 連翹壳三錢 荊芥穗一錢五分 江枳壳一錢



光杏仁三錢 淨蟬衣八分 輕馬勃八分 象貝母三錢 淡豆豉三錢

熟牛蒡二錢 鮮竹茹二錢 芫荽子一錢五分

唐右 受寒停滯脾胃為病。清濁混淆。腹痛泄瀉。似痢不爽。有墜脹之狀。胸悶不

納。舌光無苔。按脈濡遲。懷娠四月。頗慮因瀉動胎。急宜和中化濁。佐保胎元。

藿香梗一錢五分 雲茯苓三錢 六神麴三錢 陳廣皮一錢 炒扁豆衣三錢

焦查炭三錢 生白朮一錢五分 大腹皮二錢 帶壳砂仁八分 焦穀芽四錢

陳萊菔英三錢 乾荷葉一角

吳右 牙齒屬胃。胃火循經上升。風熱之邪未楚。左顴面腫紅已退。右顴面漫腫

又起。內熱口乾。心中嘈雜。舌質淡紅。脈象滑數。懷麟足月。胎火內熾。宜辛涼清解

而清胎熱。

薄荷葉八分 天花粉三錢 生赤芍二錢 熟牛蒡二錢 生甘草八分

大貝母三錢 冬桑葉三錢 苦桔梗一錢 炙姜蠶三錢 甘菊花三錢

金銀花三錢

連翹壳三錢

鮮竹葉三十張

活蘆根一尺去節

戴右

懷麟二十月。漏紅五六次。腹已大。乳不脹。脈弦小而滑。衝任虧損。肝火入營。血熱妄行。不得養胎。故胎萎不長。不能依期而產也。當宜益氣養血。清營保胎。俾氣能攝血。血足蔭胎。胎元充足。瓜熟自然蒂落。

吉林參鬚一錢

生黃芪二錢

生地炭三錢

厚杜仲三錢

生白朮二錢

白歸身二錢

阿膠珠二錢

炒條芩一錢

側柏炭一錢五分

生白芍二錢

桑寄生三錢

鮮藕一兩切片入煎

張右

妊娠九月。便溏旬餘。漏紅色紫。腰不痠。腹不墜。殊非正產之象。良由肝虛不能藏血。脾虛不能統血。中焦變化之汁。盡隨濕濁以下注也。舌苔薄膩。脈象弦滑。當宜培養中土。而化濕濁。俾得健運復常。則生氣有權。而胎元易充易熟矣。

生白朮三錢

雲茯苓三錢

春砂壳八分

桑寄生二錢

炒淮藥三錢

陳廣皮一錢

焦查炭三錢

藕節炭二枚

炒扁豆衣三錢

煨木香五分

焦麥芽三錢 乾荷葉一角

二診 孕已足月。腹痛腰痠。穀道墜脹。中指跳動。正產之時已屆。氣足則易送胎。血足則易滑胎。惟宜大補氣血。以充胎元。水足則舟行無礙之意。

炙黃芪五錢 抱茯神三錢 陳廣皮一錢 大白芍一錢五分 大熟地五錢

兔絲子二錢 炒黑荆芥八分 生白朮二錢 白歸身三錢 大川芎五分

紅棗五枚

### 附蔡松汀維產神效方

產久不下連服此方四五帖只服頭煎不用煎二以刀傷也必須多服少則不効

熟地 丹 養血真成良丹 歸身 白茯苓

西黨參 醋炙淨度版 川芎 酒炒白芍

枸杞子 四

治產久不下氣虛聲低神憊力乏血下過多面萎舌淡脉形少  
力者可服此方以益氣增水之漲則身行是順也倘以之治氣  
血未虛之難產及改更延遲矣不可不知至於產下後不可  
一滴入口信此以其補津液後也

產以氣血為主氣血足則易於送胎出口血足則易於順  
胎落地若忍痛久則傷氣而氣不足下血多則傷血而血不  
足氣亦不足產何能下此方大補氣血於臨產危急之時每  
論產婦年久氣血虛弱胞衣已破未破急以此方連服之  
五帖孔痛並則痛可立止而胎自下下或竟能睡片時產  
下多不覺其或因試痛誤認產痛服而竟不痛不產  
帖然無恙也蓋此有補益氣血以還其本原自安於無  
事矣或疑產婦新感外邪補之則恐邪固不和痛甚  
且久則墜理邪固也從表發矣到以時床有寒無寒一  
之理切勿遲疑也試驗已久萬無一失惟一經產下必不  
可

入口切勿誤服



孟河丁氏醫案卷七

產後案

趙右 新產五日。陡然瘈厥不語。神識時明時昧。脈鬱滑。舌薄膩。良由氣血虧耗。腠理不固。外風引動。內風入於經絡。風性上升。宿瘀隨之。蒙蔽清竅。神明不能自主。所以瘈厥迭發。神糊不語。症勢重險。勉擬清魂散加減。和營祛風。清神化痰。

吉林參鬚五分 炙甘草五分 琥珀屑六分冲 嫩鈎鈎三錢後入紫丹參二錢

珠茯神三錢 鮮石菖蒲八分 澤蘭葉一錢五分 炒黑荆芥炭八分

炙遠志一錢 童便一酒盅燉冲服

巖右 血藏於肝。賴脾元以統之。衝任之氣以攝之。肝腎兩虧。氣不固攝。脈細小。當宜培養肝脾。調攝衝任。八珍湯加減。

潞黨參二錢 炙甘草四分 白歸身二錢 大白芍一錢五分 抱茯神三錢

阿膠珠二錢 血餘炭二錢 川斷肉二錢 炒於朮一錢五分 生地炭四錢

葛氏十灰丸二錢包煎

沈石 新產後去血過多。頭眩眼花。神昏氣喘。自汗肢冷。脈細如絲。此乃血去陰傷。陰不抱陽。陽不攝陰。正氣難以接續。浮陽易於上越。氣血有渙散之慮。陰陽有脫離之險。血脫重症。危在傾刻。勉仿經旨。血脫益氣之義。以冀萬一之幸。

吉林參鬚一錢 全當歸三錢 養正丹二錢包煎

鄒石 產後腹痛。小溲淋漓。脈弦緊。右濡細。此營血已虧。宿瘀未楚。挾溼下注。膀胱宣化失司。宜和營祛瘀。通利州都。

全當歸二錢 硃茯神三錢 澤蘭葉一錢五分 葶薺梗一錢五分 紫丹參二錢

生草梢八分 益母草三錢 大川芎八分 絳通草八分 琥珀屑六分沖

金石 產後寒熱。汗多不解。大便溏泄。衛氣不能外護。營虛失於內守。營衛不和。邪不易達。健運無權。當宜調和營衛。扶土和中。

川桂枝二分

雲茯苓三錢

炙甘草五分

炒白芍一錢五分扁豆衣三錢

炒苡仁三錢

生白朮一錢五分陳廣皮一錢

穀麥芽各三錢紅棗二枚

生姜二片

乾荷葉一角

虞右 產後肺脾兩虧。肅運無權。遍體浮腫。咳嗽氣逆。難以平臥。脈象濡軟而滑。經云。諸濕腫滿。皆屬於脾。脾虛生濕。濕鬱生水。水濕泛濫。無所不到。肺為水之上源。不能通調水道。下輸膀胱。聚水而為腫也。肺病及腎。腎氣不納。肺虛不降。喘不得臥。職是故也。喘腫重症。擬五苓五皮合蘇子降氣湯。肅運分消。順氣化痰。以望轉機。

生白芍一錢五分肉桂心三分

炙白蘇子二錢淡姜皮六分

連皮苓四錢

化橘紅八分

炙桑皮三錢

川椒目十粒

粉猪苓二錢

光杏仁三錢

象貝母三錢

濟生腎氣丸三錢包煎

張右

新產後氣血已虧。惡露未楚。感受時氣。氤氳之邪。引動先天蘊毒。由內達

外天痘已布。尙未灌漿。身熱骨楚。苔薄膩。脈濡數。經云。邪之所湊。其氣必虛。宜益氣托漿。和營祛瘀。

生黃芪 二錢  
全當歸 二錢  
杜紅花 八分  
生甘草 四分  
京赤芍 錢半

益母草 三錢  
桃仁泥 錢半包  
紫丹參 二錢  
淨蟬衣 八分  
鮮笋尖 二錢

生姜 一片  
紅棗 二枚

莊右 未產之前。發熱咳嗽。風溫伏邪。蘊蒸氣分。肺胃兩經受病。今產後發熱不退。更甚於前。惡露未楚。苔黃脈數。良由氣血已虧。宿瘀留戀。伏邪不達。邪與虛熱相搏。所以身熱更甚也。投解肌藥不效者。因正虛不能托邪外出也。今宗傳青主先生。加入人參生化湯。養正達邪。去瘀生新。助入宣肺化痰之品。

吉林參鬚 八分  
大川芎 八分  
荆芥炭 八分  
炙桑葉 三錢  
炙甘草 五分

炮姜炭 四分  
光杏仁 三錢  
全當歸 二錢  
桃仁泥 錢半包  
象貝母 三錢

童便 一酒盅 燉溫沖服



于右。人身之經絡。全賴血液以滋養。產後陰血已虧。不能營養經脈。邪風入絡。絡有宿瘀。不通則痛。以致手不能舉。足不能履。肢節痺痛。脈細澹。當宜養血祛風。去瘀通絡。

全當歸二錢

大川芎八分

青防風八分

大白芍一錢五分 木防己二錢

西秦艸二錢

陳木瓜二錢

羌蔚子三錢

紫丹參二錢

淮牛膝二錢

嫩桑枝四錢酒炒

陳右。產後五朝。腹痛陣作。拒按。甚則泛噁。脈弦細而緊。新產營血已傷。宿瘀交阻。上冲於胃。胃失降和。凝滯於中。氣機窒塞。所謂不通則痛也。產後以去瘀爲第一要義。當宜和營去瘀。蓋瘀血去則新血可生。不治痛而痛自止。

全當歸二錢

五靈脂三錢

延胡索一錢

杜紅花八分

大川芎八分

陳廣皮一錢

台烏藥八分

桃仁泥錢半包

益母草三錢

紫丹參二錢

炙沒藥一錢

製香附一錢五分 炮姜炭四分

俞右 鼻鳴鼻乾。乾嘔。咳嗽不爽。肺有燥邪也。胸悶不舒。口甜時苦。胃有濕熱也。胸前板痛。按之更甚。痰滯阻於賁門也。自汗甚多。內熱不清。遍體骨楚。正虛陰不足也。病起胎前。延及產後。諸藥備嘗。時輕時劇。良以體虛邪實。肺燥痰濕。攻既不得。補又不可。清則助濕。燥則傷陰。每有顧此失彼之憂。尤多投鼠忌器之慮。同擬兩法並進。先投苦溫。合化。開其中隔之痰濕。繼進甘涼生津。潤其上焦之煩躁。是  
否有當。尚希高明裁政。

(先服) 水炒川雅連 四分

竹瀝半夏 二錢 枳實炭 一錢

淡乾姜 三分

橘白絡 各八分 生蛤壳 六錢

薤白頭 錢半 酒炒 川貝母 三錢

白殘花 五分

(後服) 鱉血炒銀柴胡 一錢

天花粉 三錢 鮮竹葉茹 各一錢五分

去地骨皮 炒錢半 冬桑葉 三錢

活蘆根 一尺 去節 鮮枇杷葉 五張 去毛包

張左 新產後。營陰虧耗。惡露未楚。舊患便溏。脾土薄弱。胃呆納少。舌苔薄膩。脈象濡緩。新邪舊恙。治宜兼顧。姑宜和營生新。扶土和中。

全當歸二錢

雲茯苓三錢

生白朮一錢五分

益母草三錢

杜紅花五分

焦查炭二錢

大川芎五分

炮姜炭四分

炒穀芽三錢

炒赤砂糖三錢

乾荷葉一角

二診

新產三朝。昨起寒熱。至今未退。頭痛骨楚。胸悶不思飲食。舌苔薄膩。脈象

弦滑帶數。此營血已虧。惡露未楚。氤氳之邪。乘隙而入。營衛循序失常。姑擬清魂散合生化湯加味。一以疎邪外達。一以祛瘀生新。

紫丹參二錢

大川芎四分

炮姜炭三分

炒黑荆芥炭一錢五分

益母草二錢

杜紅花六分

清水豆卷三錢

炒赤沙糖三錢

全當歸二錢

焦查炭三錢

炒穀芽四錢

炒白薇一錢

乾荷葉一角

三診

新產五朝。寒熱輕而復重。頭痛骨楚。胸悶不思飲食。舌苔膩佈。惡露未止。

脈象弦滑帶數。宿瘀留戀。氤氳之邪。挾痰滯交阻。陽明為病。再宜清魂散合生化

湯。復入疎散消滯之品。

紫丹參 二錢

杜紅花 八分

枳實炭 一錢

炒白薇 錢半

炒黑荆芥 錢半

全當歸 一錢五分 焦查炭 三錢

益母草 二錢

淡豆豉 三錢

大川芎 五分

炒穀芽 四錢

保和丸 三錢包煎

四診 新產八朝。形寒身熱。有汗不解。胸悶。飢不思納。渴不多飲。舌苔薄膩而黃。

脈象弦滑帶數。客邪移於少陽。宿瘀未楚。營衛失常。有轉瘧之機。括還慮纏綿增。

劇。再擬小柴胡湯。合清魂散。生化湯。複方圖治。

吉林參鬚 五分

杜紅花 八分

清水豆卷 四錢

嫩白薇 一錢五分 軟柴胡 五分

全當歸 二錢

紫丹參 二錢

大川芎 四分

炒黑荆芥 一錢 全瓜蒌切 三錢

炒穀芽 三錢

益母草 二錢

通草 八分

五診 新產十二朝。寒熱得退。胸悶不納如故。小溲短赤。舌苔薄膩。陰血已虧。蘊

濕未楚。脾胃運化無權。再宜養正祛瘀。和胃化濕。

吉林參鬚 五分

赤茯苓 硃砂拌 三錢

全當歸 二錢

清水豆卷 三錢



炒黑荆芥五分 福澤瀉一錢五分 穀麥芽炒各三錢 益母草二錢 陳廣皮一錢

紫丹參二錢 通草八分 佩蘭梗一錢五分 大砂仁五分研 乾荷葉一角

張右 產後兩月營陰未復。重感新邪。內停宿滯。肺胃為病。形寒身熱。有汗不解。脘痞作痛。納少泛噁。且又咳嗽。經行色紫。舌苔白膩。脈象左弦右濡。標邪正在鴟張。不能見虛投補。姑宜疎邪消滯。和中祛瘀。病去則虛自復。

炒黑荆芥錢半 清水豆卷四錢 赤茯苓三錢 金鈴子二錢 光杏仁三錢

仙半夏一錢五分 延胡索一錢 嫩前胡一錢五分 象貝母三錢 枳實炭一錢

芫蔚子二錢 帶壳砂仁八分 炒穀麥芽各三錢 佛手八分

二診 形寒身熱漸解。脘痞作痛。咳嗽則痛輒劇。納少泛噁。小溲短赤。經行色紫。舌質紅。苔薄膩。脈左弦右濡。產後營陰未復。外邪宿滯。挾肝氣橫逆。肺胃肅降失司。投劑合度。仍宜宣肺化痰。理氣暢中。

嫩前胡一錢五分 赤茯苓三錢 川棟子二錢 象貝母三錢 仙半夏二錢

炒枳壳一錢 延胡索一錢 芫蔚子三錢 川鬱金一錢五分 光杏仁三錢

春砂壳八分 絳通草八分 台烏藥八分 炒穀麥芽各三錢

馬右 未產之前已有痛風。產後二十一天。肢節痺痛。痛處浮腫。痛甚於夜。不能舉動。形寒內熱。咳嗽痰多。風濕痰瘀。羈留絡道。營衛痺塞不通。肺失清肅。胃失降和。病情夾雜。非易圖治。姑宜和營祛風。化痰通絡。

紫丹參二錢 硃茯神三錢 光杏仁三錢 木防己二錢 炒黑荆芥一錢

遠志肉一錢 象貝母三錢 夜交藤四錢 炒白薇二錢 西秦艽二錢

藏紅花八分 甜瓜子三錢 嫩桑枝四錢 澤蘭葉二錢

李右 產後二十四天。營血已虛。惡露未楚。腹痛隱隱。納穀減少。畏風怯冷。有汗不解。旬日未更衣。舌無苔。脈象濡細。衛虛失於外護。營虛失於內守。腸中津液枯槁。腑垢不得下達也。仿傅青主加參生化湯意。養營祛瘀。和胃潤腸。

吉林參鬚一錢 紫丹參三錢 春砂壳八分 生熟穀芽各三錢

全當歸三錢

藏紅花四分

全瓜蒌切四錢

益母草一錢五分  
大川芎四分

炮姜炭三分

大麻仁研四錢

朱右

產後八旬。寒熱匝月。痰多納減。脈象虛弦而數。氣虛則寒。營虛則熱。胃虛

納減。脾弱痰多。勢成蓐癆。姑宜八珍湯加減。以望轉機。

炒潞黨參三錢

全當歸二錢

銀州柴胡八分  
雲茯苓三錢

大白芍二錢

嫩白薇一錢五分  
炒於朮錢半

廣橘白一錢

大熟地三錢

炮姜炭三分

生熟穀芽各三錢

張右

新產十一天。惡露不止。少腹作痛。咳嗽音聲不揚。風寒包熱於肺。宿瘀留

戀下焦。脈象浮濡帶滑。姑宜祛瘀生新。開胃化痰。

全當歸二錢

抱茯神三錢

光杏仁三錢

嫩射干五分

紫丹參二錢

金鈴子二錢

象貝母三錢

春砂壳八分

淨蟬衣八分

延胡索一錢

藏紅花八分

冬瓜子三錢

全當歸 三錢

金銀花 三錢

全當歸 三錢

通草 三錢

坐散 三錢

白濁 三錢

桂枝 三錢

陳皮 三錢

白芍 三錢

白朮 三錢

白朮 三錢

白朮 三錢

全當歸 三錢

金銀花 三錢

全當歸 三錢

通草 三錢

坐散 三錢

白濁 三錢

桂枝 三錢

陳皮 三錢

白芍 三錢

白朮 三錢

白朮 三錢

白朮 三錢

全當歸 三錢

金銀花 三錢

全當歸 三錢

通草 三錢

坐散 三錢

白濁 三錢

桂枝 三錢

陳皮 三錢

白芍 三錢

白朮 三錢

白朮 三錢

白朮 三錢



孟河丁氏醫案卷八

武進孟河丁澤周甘仁著

男元彥彙錄

孫濟萬編訂

濟華校讐

濟民

外科案

口腦疽

張左 正腦疽兩候。瘡口雖大而深陷不起。瘡根散漫不收。色紅疼痛。舌質光紅。脈象濡緩。氣虛血虧。不能托毒外出。痰濕蘊結。營衛不從。症勢重險。再宜益氣托毒。和營化濕。冀其瘡頂高起。根脚收縮。始有出險之幸。

生黃芪 八錢

全當歸 三錢

抱茯神 三錢

生首烏 四錢

生路黨參 三錢

京赤芍二錢 灸遠志肉一錢 白茄蒂一錢 生草節八分 紫丹參三錢

鹿角霜三錢 陳廣皮一錢 大貝母三錢

（外用陽和膏、黑虎丹、九黃丹、補天丹）

錢左 腦疽三日。紅腫寒熱。外邪客於風府。蘊熱上乘。邪熱相搏。血瘀停凝。法當

疎散。

荊芥穗錢半 青防風一錢 全當歸二錢 京赤芍二錢 大貝母三錢

炙疆蠶三錢 羌活一錢 大川芎八分 香白芷八分

（外用金箍冲和、陳醋白蜜調、燉溫敷）

二診 投劑後。得大汗。熱退腫減。再用和解。

全當歸二錢 京赤芍二錢 大川芎八分 生草節八分 苦桔梗一錢

大貝母三錢 炙疆蠶三錢 晚蠶砂三錢包 絲瓜絡二錢 香白芷六分

萬靈丹 一粒入煎

(仍用金箍冲和)

柯左。腦旁屬太陽。為寒水之府。其體冷。其質沉。其脈上貫巔頂。兩旁順流而下。花甲之年。氣血已虧。加之體豐多濕。濕鬱生痰。風寒侵於外。七情動於中。與痰濕互阻於太陽之絡。營衛不從。疽遂成矣。所喜紅腫高活。尚屬佳象。起居調攝。尤當自慎。

生黃芪 三錢

青防風 一錢

生草節 八分

苦桔梗 一錢

陳廣皮 一錢

仙半夏 二錢

大川芎 八分

大貝母 三錢

炙僵蠶 三錢

羌活 一錢

小金丹

一粒陳酒化服

(外用金箍、金黃、冲和、陳醋、白蜜調、燉溫敷)

二診。腦疽偏者。較正者難治。前方連服三劑。根盤略收。瘡頂高突。有潰膿之勢。今症位雖偏。形勢尚佳。所喜瘡頭起發。胃納健旺。人以胃氣為本。有胃則生。書有明文。再擬消托兼施法。

生黃芪三錢 全當歸二錢 京赤芍二錢 陳廣皮一錢 仙半夏三錢

生草節八分 苦桔梗一錢 炙甲片錢半 皂角針錢半 筍尖三錢

大貝母三錢 炙僵蠶三錢 香白芷八分

(外用金箍、金黃、冲和)

三診。小疊進提托之劑。得膿甚暢。四圍根盤漸收。調養得宜。生機有慶。

生黃芪三錢 全當歸二錢 京赤芍二錢 紫丹參二錢 陳廣皮一錢

仙半夏三錢 雲茯苓三錢 製首烏三錢 生草節八分 紅棗二枚

自述 (外用陽和膏、九黃丹、海浮散)

天疽

唐左 天疽腫硬。位在左耳之後。症由情志抑鬱。鬱而生火。鬱火挾血。瘀凝結。營

衛不從。頗慮毒不外泄。致有內陷之變。急與提托。冀其速潰。速腐。得膿為佳。

銀柴胡一錢 全當歸二錢 京赤芍二錢 川象貝各二錢 生草節八分



陳廣皮 一錢

炙遠志 一錢

炙姜蠶 三錢

炙甲片 錢半

皂角針 錢半

琥珀蠶礬丸

一粒開水化服

二診 前投提托透膿之劑。瘡頂紅腫高活。有潰膿之象。是屬佳兆。惟恙從七情

中來。務須恬惓虛無。心曠神怡。勝乞靈於藥石也。

生黃芪 三錢

全當歸 二錢

京赤芍 二錢

紫丹參 二錢

生草節 八分

銀柴胡 八分

生香附 一錢

皂角針 錢半

川象貝 各三錢

炙姜蠶 三錢

筍尖 三錢

琥珀蠶礬丸

一粒開水化服

三診 疽頂隆起。內膿漸化。旋理調護。可保無慮矣。

全當歸 二錢

京赤芍 二錢

銀柴胡 八分

生草節 八分

川象貝 各三錢

炙疆蠶 三錢

陳廣皮 一錢

半夏麩 二錢

製首烏 三錢

香白芷 六分

何右

天疽匝月。色黑平塌。神糊脈細。汗多氣急。陰陽兩損。肝腎俱敗。瘍症中之

七惡已見。雖華陀再世。亦當謝不敏也。勉方冀幸。

吉林參 二錢

生黃芪 六錢

血鹿片 八分

生於朮 二錢

清炙草 八分

雲茯苓 三錢

炮姜炭 五分

川貝母 三錢

大熟地 四錢

五味子 六分

左牡蠣 四錢

半夏麴 三錢

一。二診。服藥後神清思食。脈象弦硬。此係孤陽反照。不足恃也。勉宗前法。以冀萬

原方加熱附片一錢

骨槽風

周左。骨槽風腫硬不痛。牙關拘緊。纏綿二月餘。此陰症也。位在少陽。少陽少血。多氣之臟。脈絡空虛。風寒乘隙而入。痰瘀凝結。徒恃清涼無益也。法當溫化。陽和湯主之。

淨麻黃 五分

肉桂心 四分

大熟地 四錢 二味同搗

炮姜炭 五分

生草節 八分

白芥子 一錢 炒研 鹿角霜 三錢

小金丹 一粒 陳酒化服

按周姓係余之鄉戚初延當地瘍醫治之皆用清涼散火之劑愈服而腫愈  
堅後離鄉來滬邀余設法余轉求於師師曰此骨槽風也初用荊防敗毒萬  
靈丹之類可以取效醫者不察妄用清涼以致風寒痰瘀膠結不化幸年方  
少壯體質尙強脾胃未見敗象否則殆矣即內服陽和湯外用生姜切片上  
按艾絨灸之再覆以陽和膏如此五日牙關漸利旋因客旅起居不便歸家  
依法調治照原方連服二十四劑病竟全愈受業劉佐彤謹誌

朱右 骨槽風破潰經年膿積成骨流水清稀氣血兩虧不能載毒外出纏綿之  
症也法與補托。

潞黨參 三錢

生黃芪 四錢

全當歸 二錢

京赤芍 二錢

雲茯苓 三錢

炮姜炭 五分

陳廣皮 一錢

川貝母 三錢

炙姜蠶 三錢

香白芷 六分

金石

骨槽風穿顛落齒膿水臭穢症屬棘手。

西洋參 二錢

北沙參 三錢

川石斛 四錢

赤白芍 各錢半

金銀花 三錢

粉丹皮二錢 川貝母三錢 天花粉三錢 旱蓮草二錢 黛蛤散六錢包

施左 頤腫堅硬。寒熱交作。牙關開合不利。骨槽風之漸也。宜與疎散。

荊芥穗錢半 青防風一錢 薄荷葉八分 炒牛蒡二錢 生草節八分

苦桔梗一錢 大貝母三錢 炙姜蠶三錢 晚蠶砂三錢包 山慈菇片八分

萬靈丹一粒入煎

(外用消核錠、陳醋磨敷)

二診 寒熱已退。腫硬漸消。此係風痰交阻絡道所致。再與疎散。

荊芥穗錢半 青防風一錢 薄荷葉八分 炒牛蒡二錢 生草節八分

苦桔梗一錢 大貝母三錢 炙姜蠶三錢 小青皮一錢 光杏仁三錢

萬靈丹一粒入煎

洪左 頰車漫腫焮紅。且有寒熱。肝胃之火升騰。風熱之邪外乘。宜以清疎。

荊芥穗錢半 青防風一錢 薄荷葉八分 炒牛蒡二錢 生石膏四錢打



生草節八分

苦桔梗一錢

京赤芍二錢

大貝母三錢

炙姜蠶三錢

金銀花三錢

茅蘆根各一兩

鄒左

骨槽癰。內外穿潰。腐爛已久。氣陰兩傷。少陰伏熱上升。喉痺燥痛。蒂丁下墜。妨於嚥飲。咳嗽痰濃。夾紅。舌質紅絳。脈象濡小而數。加之手足浮腫。動則氣喘。胸膈骨脹。肺絡損傷。子盜母氣。脾土薄弱。肺喜清潤。脾喜香燥。治肺碍脾。治脾碍肺。棘手重症。勉擬培土生金。養肺化痰。未識能得應手否。

南沙參三錢

生甘草六分

瓜萸皮二錢

豬膚三錢刮去油毛

淮山藥三錢

苦桔梗一錢

生苡仁四錢

冬瓜子皮各三錢

連皮苓四錢

川象貝各二錢

藏青果一錢

(外用金不換吹喉搽腐)

牙疳

謝左

腎主骨。齒為骨餘。牙齦屬胃。疹痘後。熱毒內蘊。腎胃兩經。以致牙疳腐爛。

苔黃脈數。聽其漫延。恐有穿顙落齒之險。重症也。姑擬蘆薈消疔飲加味。清陽明而解熱毒。

真蘆薈 八分

甘中黃 八分

金銀花 四錢

活貫衆 三錢

川升麻 三分

胡黃連 四分

黑山梔 一錢五分

京元參 一錢五分

生石膏 三錢打

銀柴胡 八分

活蘆根 一尺去節

(外用走馬牙疳散、桐油調敷、並用托藥方)

牙岩

何右 營血久虧。肝鬱不達。鬱從火化。火性上炎。致發牙岩。已延半載。慮其翻花出血。下部痿軟乏力。擬養營清上。

小生地 四錢

肥知母 錢半

生甘草 六分

粉丹皮 二錢

京赤芍 二錢

連翹壳 三錢

川黃柏 錢半

京元參 二錢

大貝母 三錢

生蒲黃 三錢包

藕節 四枚

大頭瘟

沈石 重感氤氳之邪。引動伏溫。外發溫毒。滿面紅腫。透及後腦。耳根結塊。久而不消。形寒身熱。逾時得汗而解。胸悶不思飲食。舌苔薄膩。微黃。脈象左弦數。右濡數。慮其纏綿增劇。姑宜清解伏溫。而化痰瘀。

薄荷葉 八分

硃茯神 三錢

荊芥穗 八分

鮮竹茹 一錢五分 清水豆卷 四錢

熟牛蒡 二錢

江枳壳 一錢

連翹壳 三錢

大貝母 三錢

淨蟬衣 八分

苦桔梗 一錢

生赤芍 二錢

板藍根 二錢

二診 大頭瘟復發。滿面腫紅。痲痛。寒熱日發兩次。得汗而解。胸悶不思飲食。口乾不多飲。耳根結塊。久而不消。舌苔薄膩。脈象左弦數。右濡數。伏溫時氣。客於少陽陽明之絡。溫從內發。故吳又可云。治溫有汗而再汗之例。體質雖虛。未可滋養。恐有留邪之弊。昨投普濟消毒飲加減。尚覺獲效。仍守原法為宜。

薄荷葉 八分

硃茯神 三錢

金銀花 三錢

生草節 四分

板藍根 二錢

熟牛蒡二錢 苦桔梗一錢 連翹壳三錢 生赤芍二錢 淨蟬衣八分

輕馬勃八分 鮮竹茹二錢 通草八分

三診 大頭瘟之後。頭面紅色未退。睡醒後時覺烘熱。逾時而平。舌苔乾白而膩。脈象左弦數。右濡滑。餘溫留戀少。陽陽明之絡。引動厥陽升騰。所有之痰濕阻於中焦。陽明通降失司。納穀減少。小溲短赤。職是故也。滋陰而留邪。燥濕則傷陰。有顧此失彼之弊。再宜清泄伏溫為主。宣化痰濕佐之。

霜桑葉三錢 生赤芍二錢 赤茯苓三錢 夏枯花一錢五分 滁菊花三錢

連翹壳三錢 福澤瀉一錢五分 枯碧竹三錢 薄荷炭八分 輕馬勃八分

象貝母三錢 鮮竹茹一錢五分 金銀花露六兩後入

四診 昨投清泄伏溫。宣化痰濕之劑。頭面紅色略減。烘熱稍平。納穀減少。舌乾白而膩。餘濕留戀陽明之絡。厥陽易於升騰。痰濕互阻中焦。脾胃運輸無權。已見効機。仍守原意出入。陰分雖虧。不可滋養。俾得伏溫速清。則陰分自復。



冬桑葉三錢

象貝母三錢

輕馬勃八分

碧玉散三錢包

滁菊花三錢

生赤芍二錢

赤茯苓二錢

廣橘白一錢

薄荷葉八分

連翹壳三錢

福澤瀉一錢五分 鮮竹茹一錢五分 夏枯花一錢五分 金銀花露六兩後入

五診 面部紅色漸退。烘熱形寒。時作時止。胸悶不舒。納穀減少。舌中微剝。後薄膩。脈象左濡小。右濡滑。陰分本虧。肝經氣火易升。濕痰中阻。胃失降和。絡中蘊濕未楚。營衛失其常度。今宜清泄厥陽。和胃化痰。待伏溫肅清後。再為滋陰潛陽可也。

冬桑葉三錢

硃茯神三錢

珍珠母五錢

仙半夏一錢五分 滁菊花三錢

生赤芍一錢五分

嫩白薇一錢五分

北秫米三錢包

碧玉散三錢包

川象貝各二錢

通草八分

嫩鈎鈎三錢後入

鮮竹茹一錢五分 橘白絡各八分

朱左

頭面腫大如斗。寒熱口乾。咽痛。腑結。大頭瘟之重症也。頭為諸陽之首。惟

風可到。風為天之陽氣。首犯上焦。肝胃之火。乘勢升騰。三陽俱病。擬普濟消毒飲

加減。

荆芥穗 錢半

青防風 一錢

軟柴胡 八分

酒炒黃芩 錢半

酒炒川連 八分

苦桔梗 一錢

連翹壳 三錢

炒牛蒡 二錢

輕馬勃 八分

生甘草 八分

炙姜蠶 三錢

酒製川軍 三錢

板藍根 三錢

二診

腫勢較昨大鬆。寒熱咽痛亦減。既見效機。未便更張。

荆芥穗 錢半

青防風 一錢

薄荷葉 八分

炒牛蒡 二錢

酒炒黃芩 一錢

酒炒川連 八分

生甘草 六分

苦桔梗 一錢

輕馬勃 八分

大貝母 三錢

炙姜蠶 三錢

連翹壳 三錢

板藍根 三錢

三診

腫消熱退。咽痛未愈。外感之風邪已解。炎炎之肝火未靖也。再與清解。

冬桑葉 三錢

生甘草 六分

金銀花 三錢

甘菊花 二錢

苦桔梗 一錢

連翹壳 三錢

粉丹皮 錢半

輕馬勃 八分

黛蛤散 五錢包

鮮竹葉 三十張

陶右

頭面漫腫。焮紅。寒熱日夜交作。前醫投以承氣。進凡三劑。病象依然不減。

夫身半以上。天之氣也。爲諸陽薈萃之樞。外感風溫之邪。引動少陽胆火上升。充斥清竅。清陽之地。遂如雲霧之鄉。承氣是瀉胃中之實熱。病在上焦。戕伐無故。所以病勢有進無退。東垣普濟消毒飲。專爲此病而設。加減與之。以觀進退。

軟柴胡 八分

薄荷葉 八分

炒牛蒡 二錢

青防風 一錢

生甘草 八分

苦桔梗 一錢

輕馬勃 八分

大貝母 三錢

炙姜蠶 三錢

炙升麻 三分

酒炒黃芩 一錢

酒炒川連 五分

板藍根 三錢

杜左 巔頂之上。惟風可到。風溫疫癘之邪。客於上焦。大頭瘟。頭面焮紅腫痛。壯熱口乾。溲赤便結。苔薄膩。脈鬱滑而數。風屬陽。溫化熱。如烟如霧。瀰漫清空。蘊蒸陽明。症非輕淺。亟擬普濟消毒飲。加味。清澈風邪。而通腑氣。仿經旨火鬱發之。結者散之。溫病有下不嫌早之例。

薄荷 八分

山梔 錢半

馬勃 八分

銀花 三錢

豆豉 三錢

大貝 三錢

牛蒡 二錢

生草 八分

赤芍 錢半

連翹 三錢

桔梗八分

淡芩錢半

生軍八分

板藍根三錢

一劑腑通去川軍服三劑愈

陳左 大頭瘟頭面腫紅焮痛發熱甚壯口渴欲飲頭痛如劈入夜譫語舌灰糙脈洪數此時氣疫癘客於上焦疫邪化火傳入陽明之裏津液已傷厥陽獨亢頗慮昏厥亟擬生津清溫以制其焰

鮮石斛三錢

薄荷八分

銀花三錢

生甘草八分

鮮竹葉三十張

天花粉三錢

牛蒡三錢

連翹三錢

羚羊片五分另沖服

生石膏三錢

大青葉三錢

馬勃八分

□時毒

史左 時毒五天寒熱頭痛風邪挾痰凝結營衛不從急宜疎散消解

荊芥穗一錢

青防風一錢

薄荷葉八分

炒牛蒡二錢

生草節八分

苦桔梗一錢

輕馬勃八分

大貝母三錢

炙姜蠶三錢

生蒲黃三錢包



不煎山慈菇片八分 萬靈丹一大粒入煎

瘰癧

高右 瘰癧發於耳後頭痛脈弦少陽胆火上升挾痰凝結宜清解化痰法

羚羊尖八分 京元參二錢 薄荷葉八分 川貝母三錢 生牡蠣六錢

連翹壳三錢 淡海藻錢半 海蛤粉四錢 夏枯草二錢

(外用消核錠陳醋磨敷)

翟左 瘰癧之生也多由於胆汁之不足丹溪云瘰癧皆起於少陽胆經少陽風火之府也內寄相火風氣通肝與少陽相合少陽屬木木最易鬱鬱未有不化火者也鬱火與相火交煽膽汁被其消燦煉液成痰痰即有形之火火即無形之痰痰火相聚為患成為瘰癧發於耳後頸項之間延今已有半載屢屢失寐時時頭痛一派炎炎之象非大劑清化不足以平其勢非情懷寬暢不足以清其源二者並施或可消患於無形此正本清源之治也

羚羊尖 八分  
大地 四錢  
銀柴胡 一錢  
京元參 四錢  
象貝母 四錢

生牡蠣 四錢  
竹瀝 半夏 二錢  
海蛤粉 四錢  
淡海藻 二錢  
夏枯草 二錢

紫菜 二錢  
陳海蜇皮 二兩 漂淡  
大葶薺 二兩 洗打 二味煎湯代水

(外用海浮、九寶、九仙、太乙膏)

鄭右 癰瘍自頸竄至胸膈。胛窩破潰深大。內熱脈數。經閉。穀飲不香。勢入損門。

急宜養陰清熱。

南沙參 三錢  
川石斛 四錢  
炙鱉甲 三錢  
青蒿梗 錢半  
地骨皮 三錢

粉丹皮 二錢  
雲茯苓 三錢  
川貝母 四錢  
功勞子 三錢  
甘蔗 一兩

(外用桃花、海浮、太乙膏)

朱右 痰癰竄發。未潰者腫硬疼痛。已潰者膿水不多。經停半載。寒熱食減。肝脾

腎三者並虧。難治之症也。肝藏血。脾統血。腎藏精。三經精血大虧。血脈乾澇。經水

不通。經不通則氣不行。氣不行則癰癥成矣。當補益三陰。怡養性情。

吉林參鬚錢半 銀柴胡一錢 大生地四錢 炙鱉甲三錢 地骨皮三錢

生牡蠣六錢 廣橘紅一錢 雲茯苓三錢 生於朮錢半 京元參二錢

夏枯草二錢 川象貝各四錢 紅棗四枚

二診 寒熱已退。納穀略增。項間纍纍成串。彼沒此起。此歛彼潰。三陰精血不足。損症之根萌也。還宜填補三陰。怡養性情。庶潰易斂。而腫易消矣。

吉林參鬚錢半 雲茯苓三錢 生於朮錢半 清炙草八分 廣橘白一錢

仙半夏二錢 厚杜仲三錢 川斷肉三錢 大生地四錢 元武板四錢

川象貝各四錢 生牡蠣四錢 紅棗四枚

黃左 陰虛肝火上升。肺經痰熱入絡。頸間痰癭腫大。內熱咳喘。涕中夾紅。宜滋

陰清肝。養肺化痰。

南沙參三錢 川石斛四錢 石決明四錢 粉丹皮二錢 光杏仁三錢

象貝母三錢 京元參二錢 瓜蒌皮三錢 鮮竹茹二錢 夏枯草二錢

海蛤粉四錢

枇杷葉三錢去毛包

(外用消核錠酒磨敷)

□痰核

陳石 陰虛痰熱結於脈路。項左痰核破潰。近及結喉。胛骨腫痛。四肢痠楚。陰血虧耗。營衛不能流通。宜養陰清絡法。

羚羊尖八分

小生地四錢

炙鱉甲三錢

全當歸二錢

粉丹皮二錢

京元參二錢

京赤芍二錢

天花粉三錢

川黃柏一錢

絲瓜絡二錢

大貝母三錢

竹二青二錢

(外用海浮太乙膏)

黃石 少陽相火。挾痰上升。頸左痰核。腫突堅硬。勞則作痛。並起水泡。防其破潰。擬養陰清肝。

羚羊尖八分

粉丹皮二錢

京赤芍二錢

全當歸二錢

京元參二錢



大貝母三錢

炙姜蠶三錢

夏枯草二錢

廣橘紅八分

海蛤粉四錢

淡海藻二錢

連翹壳三錢

海蜇皮二兩漂淡

大葶藶二兩洗打二味煎湯代水

痰毒

費右

盤頸痰毒半月。勢將成膿。

熟牛蒡二錢

大貝母三錢

炙姜蠶三錢

粉丹皮二錢

京赤芍二錢

酒炒黃芩二錢

陳廣皮二錢

粉甘草六分

夏枯草二錢

竹二青二錢

小金丹 一粒陳酒化服

(外用金箍、金黃、葱汁、白蜜、調燉溫敷)

鮑左

鎖喉痰毒。漫腫疼痛。根盤焮紅。風溫痰熱。蘊結上焦。宜辛涼清解。

荊芥穗一錢

青防風一錢

薄荷葉八分

炒牛蒡二錢

生草節八分

苦桔梗一錢

輕馬勃八分

大貝母三錢

炙姜蠶三錢

金銀花三錢

連翹壳三錢

海蛤粉四錢

六神丸十粒吞服

一二診 清解後證象較鬆。藥既合病。仍宗原法進步。

薄荷葉 八分 生草節 八分 大貝母 三錢 熟牛蒡 二錢 苦桔梗 一錢

炙姜蠶 二錢 青防風 一錢 輕馬勃 八分 京赤芍 二錢 金銀花 三錢

海蛤粉 三錢 山慈菇片 八分 六神丸 十粒 吞服

周左 痰毒漫腫作痛。釀膿之兆。宜與和托。以冀一潰。症自安矣。

薄荷葉 八分 熟牛蒡 二錢 京赤芍 二錢 生草節 六分 苦桔梗 一錢

輕馬勃 八分 大貝母 三錢 炙姜蠶 三錢 山慈菇片 八分 炙甲片 錢半

皂角針 錢半 絲瓜絡 二錢

痰瘤

錢左 陽明痰氣循經上升。結於上腭。發為痰瘤。腫大且堅。鼻旁高突。迄今年餘。

勢須破潰。宜化痰清熱。

法半夏 二錢 廣橘紅 八分 大貝母 三錢 炙姜蠶 三錢 京元參 二錢

京赤芍二錢 苦桔梗一錢 連翹壳三錢 海蛤粉四錢 淡昆布錢半

淡海藻錢半 竹二青二錢 海蜇皮一兩漂淡 葶薺二十枚洗打二味煎湯代水

（外用中白散搽）

宋式 血瘤

汪左 肝火逼血上行。凝結少陽之分。右耳根血瘤有年。驟然脹大。堅腫色紅。日夜掣痛。有外潰之勢。症屬不治。勉擬涼血清肝。

羚羊尖一錢 小生地三錢 粉丹皮二錢 京赤芍二錢 上川連四分

黑山梔錢半 京元參二錢 側柏葉錢半 生蒲黃三錢包 大貝母三錢

連翹壳三錢 藕節四枚

氣癭

王左 肩膊腫大如盆。名曰氣癭。難治之症也。治宜調營順氣。

潞黨參二錢 雲茯苓三錢 生白朮一錢 全當歸二錢 大白芍二錢

大川芎八分 陳廣皮一錢 仙半夏一錢 製香附錢半 淡昆布二錢

淡海藻二錢 紅棗四枚 生姜二片

(外用冲和膏)

孫左 痰氣凝於肉裏。右臂膊發為氣癭。腫大如盆。不易調治。擬養營流氣。而化痰癧。

全當歸二錢 大白芍二錢 大川芎八分 大生地三錢 杭菊花錢半

紫丹參二錢 製香附錢半 川續斷三錢 柏子仁三錢 小金丹一粒

發背

宋左 中發背。腐潰。得膿不多。大似覆碗。肉堅腫。瘡頂深陷。臨晚寒熱不壯。納穀減少。舌苔薄膩。脈象虛弦。背脊屬督脈所主。脊旁為太陽之經。督陽已衰。太陽主寒水之化。痰濕蘊結。營血凝塞。此陰疽也。勢勿輕視。急宜助督陽以托毒。和營衛而化濕。冀其瘡頂高起。膿毒外泄。始能入於坦途。



生黃芪 五錢

硃茯神 三錢

陳廣皮 一錢

鹿角膠 一錢五分 紫丹參 三錢

仙半夏 二錢

大貝母 三錢

生草節 五分

全當歸 三錢

紅棗 四枚

生熟穀芽 各三錢

(洗方)

全當歸 二錢

生草節 六分

獨活 二錢

大川芎 二錢

石菖蒲 二錢

鮮豬腳爪 一枚 劈碎 煎湯洗之

(外用九黃海浮陽和膏)

二診 中發背腐潰得膿不多。大如覆碗。瘡頂不起。四圍腫硬。色紫。納穀減少。舌苔薄膩。脈象濡滑。少陰陰陽本虧。痰濕蘊結太陽之絡。營衛凝塞。肉腐為膿。前投助陽托毒和營化濕之劑。尚覺合度。仍守原意出入。

生黃芪 六錢

硃茯神 三錢

陳廣皮 一錢

春砂壳 八分

生草節 四分

紫丹參 三錢

炙遠志肉 一錢

全當歸 三錢

生熟穀芽 各三錢

鹿角膠三錢

仙半夏三錢

大貝母三錢

紅棗四枚

三診 中發背腐潰。腐肉漸脫。膿漸多。四圍腫硬略減。舌苔白膩。脈象虛弦而滑。少陰陰陽本虧。痰濕凝結太陽之絡。營衛循序失常。仍宜助陽益氣。化濕托毒。冀其正氣充足。則膿自易外泄。

生黃芪六錢

硃茯神三錢

全當歸三錢

生草節四分

紫丹參二錢

陳廣皮一錢

春砂壳八分

炙遠志肉一錢

炒赤芍一錢五分  
仙半夏二錢

紅棗四枚

鹿角霜二錢

大貝母三錢

生熟穀芽各三錢

(外用九黃、呼膿、海浮、陽和膏)

四診 中發背腐肉漸脫。膿亦多。根脚腫硬亦收。苔薄膩。脈虛滑。少陰陰陽兩虧。痰濕稽留太陽之絡。營衛循序失常。飲食喜甜。中虛故也。再宜助陽益氣。化濕托毒。佐入和胃之品。

生黃芪六錢

雲茯苓三錢

全當歸三錢

光杏仁三錢

紫丹參二錢

炙遠志肉一錢 陳廣皮一錢 紅棗五枚 生草節四分 仙半夏三錢

春砂壳八分 鹿角霜二錢 川象貝各二錢 生熟穀芽各三錢

五診 中發背、腐肉漸脫。得膿亦多。根脚腫硬亦鬆。惟胃納不旺。脈象左虛弦。右濡滑。少陰陰陽兩虧。蘊毒痰濕。稽留太陰之絡。脾胃運化失其常度。再宜益氣托毒。和胃化濕。

生黃芪四錢 全當歸二錢 仙半夏三錢 鹿角霜四錢 紅棗五枚

紫丹參二錢 雲茯苓三錢 陳廣皮一錢 炙欬冬一錢五分 生薑一片

生草節四分 炙遠志肉一錢 春砂仁一錢 生熟穀芽各三錢

六診 中發背、腐肉已去其半。得膿亦多。根脚腫硬亦鬆。胃納不旺。脈象左虛弦。右濡滑。少陰陰陽兩虧。蘊毒痰濕留戀。一時未易清徹。再宜益氣托毒。和胃化痰。

生黃芪四錢 生草節四分 仙半夏一錢五分 紫丹參二錢 抱茯神三錢

陳廣皮一錢 全當歸二錢 鹿角霜三錢 生熟穀芽各三錢

杜赤豆五錢

紅棗五枚

(洗藥方)

全當歸三錢

生草節三錢

石菖蒲一錢五分

猪脚爪

一枚劈碎

紫丹參三錢

生赤芍三錢

蜂房窠二錢

煎湯洗之

(紅肉上補天丹海浮散腐肉上桃花散九黃丹外貼陽和膏)

七診 中發背腐肉已去其半。得膿亦多。四圍根脚漸平。納穀不旺。臨晚足跗浮腫。牙齦虛浮。脈象左濡弦。右濡滑。氣血兩虧。脾胃不健。餘毒蘊濕未楚。再宜益氣托毒。崇土化濕。

生黃芪四錢

抱茯神三錢

全當歸二錢

紫丹參二錢

陳廣皮一錢

冬瓜皮三錢

生白朮一錢五分

生草節四分

焦穀芽三錢

紅棗五枚

(陽和膏、九黃、海浮、補天九仙)

八診 中發背腐肉十去七八。四圍根脚亦覺漸收。牙齦虛浮。臨晚足跗微腫。脈



象左虛弦不柔。右濡滑。氣血兩虧。浮火易升。脾弱清氣下陷。餘毒留戀。再宜益氣托毒。崇土化濕。

生黃芪 四錢

抱茯神 三錢

淮山藥 三錢

冬瓜皮 三錢

紫丹參 三錢

全當歸 三錢

生白芍 一錢

紅棗 五枚

生草節 四分

陳皮 一錢

生熟穀芽 各三錢

(陽和膏補天海浮九黃桃花)

九診 中發背腐肉已去七八。根脚亦平。膿水亦少。惟納穀不香。牙齦虛腫。面部虛浮。脈左虛弦。右濡滑。氣血兩虧。津少上承。脾胃不健。運化失常。再宜益氣托毒。理脾和胃。

生黃芪 四錢

雲茯苓 三錢

大貝母 三錢

冬瓜子 三錢

紫丹參 二錢

陳廣皮 一錢

佩蘭梗 一錢五分

紅棗 四枚

全當歸 二錢

生草節 四分

生熟穀芽 各三錢

（陽和膏、桃花、九黃補天）

十診 中發背、腐肉已除。新肉已生。納穀衰少。口舌糜點。牙齦腫痛。妨於嚥納。便溏似痢。苔膩佈。脈象左虛弦。右濡滑。此乃氣陰兩虧。無根之火。易于上升。脾胃不運。濕濁留戀。人以胃氣為本。再宜和胃運脾。宣化濕濁。

炒淮藥 三錢

炒扁豆衣 三錢

佩蘭梗 一錢五分

藏青果 一錢  
雲茯苓 三錢

新會皮 一錢五分

穀麥芽 各三錢  
乾荷葉 一角

野薔薇花露 二兩

香稻葉露 二兩 二味後入

（龍腦薄荷

一支剪碎泡湯洗口舌糜腐處

用珠黃散搽之）

十一診 中發背、腐肉已去七八。新肉已生。便溏似痢亦止。惟口舌糜點碎痛。牙齦虛浮。妨於嚥飲。納穀減少。苔薄膩。左脈弦象略緩。右部濡滑。此氣陰兩虧。虛火挾濕濁上浮。脾胃運化無權。人以胃氣為本。再宜和胃清宣。

炒淮藥 三錢

川象貝 各二錢

通草 八分

佩蘭梗 一錢五分  
雲茯苓 三錢

陳廣皮 一錢

炒穀麥芽 各三錢

香稻葉露 三兩

薔薇花露 三兩 二味後入

十二診 中發背腐肉雖去七八。新肉生長遲遲。皆由正氣虧虛。不能生長肌肉。惟口舌糜腐碎痛。牙齦腐爛。妨於嚙飲。穀食衰少。苔粉膩。虛火挾濕濁上浮。脾胃生氣無權。還慮正虛不支。致生變遷。再宜和胃清化。

真蘆薈 八分

甘中黃 五分

赤茯苓 三錢

京元參 一錢五分 胡黃連 五分

活貫衆 三錢

川象貝 各二錢

通草 八分

生熟穀芽 各三錢

薔薇花露 三兩 香稻葉露 三兩 後入

乳岩

莊右 脈左寸關弦數不靜。右寸關濡滑而數。舌苔剝絳。乳岩腫硬已久。陰液虧而難復。肝陽旺而易升。血不養筋。營衛不得流通。所以睡醒則遍體痠疼。腰腿尤甚。連投滋陰柔肝。清熱安神之劑。尚覺合度。仍守原意出入。

西洋參 二錢另煎汁沖服

硃茯神 三錢

蛤粉炒阿膠 一錢五分

絲瓜絡 二錢

霍山石斛 三錢

生左牡蠣 八錢

嫩白薇 一錢五分 鮮竹茹 二錢

大麥冬 二錢

青龍齒 三錢

全瓜蒌 四錢切

鮮枇杷葉 三張去毛包

鮮生地 四錢

川貝母 二錢

生白芍 一錢五分 香穀芽露 半斤後入

(外用金箍冲和陳醋白蜜調)

二診 脈象尺部細弱寸關弦細而數舌質紅絳遍體痠痛腰膝尤甚納穀減少口乾不多飲腑行燥結小溲淡黃乳岩依然腫硬不消皆由陰液虧耗血不養筋血虛生熱筋熱則痠絡熱則痛况肝主一身之筋筋無血養虛陽易浮腹內作脹亦是肝橫熱鬱陽明通降失司欲清絡熱必滋其陰欲柔其肝必養其血俾得血液充足則絡熱自清而肢節之痛亦當輕減矣

西洋參 二錢另煎汁沖服

生左牡蠣 八錢 蛤粉炒阿膠 一錢五分

霍山石斛 三錢 青龍齒 二錢

羚羊片 四分另煎汁沖服

大麥冬 三錢



生白芍二錢

嫩白薇一錢五分 鮮生地四錢

甜瓜子三錢

鮮竹茹二錢

嫩桑枝一兩

絲瓜絡五錢 二味煎湯代水

另真珠粉二分

用嫩鈎鈎三錢

金器一具 煎湯送下

三診 遍體痠疼。腰膝尤甚。溲黃便結。納穀減少。口熱不多飲。乳岩依然腫硬不消。皆由陰液虧耗。血不養筋。筋熱則痠。絡熱則痛。病情夾雜。難許速效。再宜養血清絡。

西洋參二錢

羚羊片 八分另煎汁冲服

黑芝麻三錢

霍山石斛三錢

左牡蠣八錢

青龍齒三錢

蛤粉炒阿膠二錢

大地龍三錢 酒洗

大麥冬二錢

生白芍一錢五分 首烏藤三錢

鮮生地四錢

川貝母五錢

甜瓜子三錢

嫩桑枝一兩

絲瓜絡五錢 二味煎湯代水

珍珠粉二分

用硃燈心 兩札

金器一具 煎湯送下

四診 乳岩起病。陰血虧虛。肝陽化風入絡。肢節痠疼。心悸氣逆。時輕時劇。音聲

欠揚。舌質光紅。苔薄膩黃。脈象左弦數。右濡數。病情夾雜。還慮增劇。姑宜養肝體以柔肝木。安心神而化痰熱。

西洋參 一錢五分 硃茯神 三錢

川象貝 各二錢

柏子仁 三錢

黑芝蔴 三錢

霍山石斛 三錢 青龍齒 三錢

瓜蒌皮 二錢

鳳凰衣 一錢五分 夜交藤 四錢

珍珠母 六錢

生地 三錢 蛤粉拌

嫩鈎鈎 三錢 後入 薔薇花露 一兩

香稻葉露 四錢 二味後入

珍珠粉 二分

硃燈心 二札

煎湯送下

王右 肝鬱木不條達。挾痰瘀凝結。乳房屬胃。乳頭屬肝。肝胃兩經之絡。被阻遏而不得宣通。乳部結塊。已延三四月之久。按之疼痛。恐成乳岩。姑宜清肝鬱而化痰瘀。復原通氣。飲合逍遙散出入。

全當歸 二錢

京赤芍 二錢

銀柴胡 八分

薄荷葉 八分

青陳皮 各一錢

苦桔梗 一錢

全瓜蒌 四錢 切

紫丹參 二錢

生香附 二錢

大貝母 三錢

炙姜蠶三錢

絲瓜絡二錢

青橘葉 錢半

肝疽

鄭左 肝疽生于左脇肋。漫腫而硬。按之疼痛。大如手掌。此氣陰兩虧。肝鬱挾痰。濕凝結。營衛不從。有釀膿之象。宜消托兼施。消未成之毒。托已成之膿也。如膿從外泄則吉。破膜則危。

生黃芪 六錢

生草節 八分

川象貝 各二錢

皂角針 一錢

全當歸 三錢

苦桔梗 一錢

炙姜蠶 三錢

陳廣皮 一錢

生赤芍 三錢

銀州柴胡 一錢

炙甲片 一錢

(陽和膏、十將丹、平安散)

二診 前投益氣消托之劑。肝疽腫硬疼痛。較前大減。可望消散。惟神疲肢倦。形肉削瘦。脈象濡軟。氣血兩虧。痰濕未能盡化。既見效機。仍守原意出入。

生黃芪 六錢

雲茯苓 三錢

川象貝 各二錢

杜赤豆 一兩

全當歸 三錢

生草節六分

紫丹參二錢

生苡仁四錢

生赤芍三錢

陳廣皮一錢

鮮荷葉一角

肺疽

王右 肺疽已成。漫腫如盆。疼痛不已。胸悶氣結。汗多肢冷。脈象濡細。初由風邪痰瘀蘊結肺俞。繼則釀膿。肺炎葉舉。清肅之令。不得下行。頗慮正不支持。致虛脫之變。勉擬和正托毒。清肺化痰。盡人力以冀天眷耳。

生黃芪四錢

抱茯神三錢

京赤芍二錢

絲瓜絡二錢

生草節八分

炙遠志肉一錢

象貝母三錢

冬瓜子二錢

苦桔梗一錢

全當歸二錢

炙姜蠶三錢

瓜蒌皮二錢

水炙桑皮二錢

鼻痔

傅右 陽明濕濁上升。鼻痔壅塞。頭目不清。畏風怯冷。肢體作痠。肺胃氣虛。擬營衛並調。兼肅肺胃。



潞黨參 錢半

全當歸 二錢

大白芍 錢半

陳辛荑 八分

蒼耳子 錢半

大川芎 八分

藿香梗 錢半

雲茯苓 三錢

生白朮 一錢

陳廣皮 一錢

煨姜 二片

(外用柳花散麻油調搽)

鼻疳

賈左

肺胃積熱釀成鼻疳迎香腐缺鼻準已塌內外之腫不消防其崩陷擬再

造散加減

羚羊尖 一錢

大麥冬 三錢

天花粉 三錢

京元參 二錢

京赤芍 二錢

酒炒黃芩 一錢

寒水石 三錢

連翹壳 三錢

大貝母 三錢

夏枯花 二錢

鮮竹葉 三十片

乾蘆根 一兩去節

(外用治疳結毒靈藥)

疔瘡

李右 掌心疔頂雖潰。未曾得膿。四圍腫硬疼痛。濕火蘊結。血凝毒滯。症勢非輕。急宜清解托毒。

甘菊花 五錢 地丁草 三錢 京赤芍 二錢 薄荷葉 八分 生草節 六分

大貝母 三錢 炙姜蠶 三錢 金銀花 三錢 連翹壳 三錢 草河車 錢半

絲瓜絡 二錢 外科蟾酥丸 二粒 開水化服

(外用太乙膏、九黃、四周用玉露散、菊花露調敷)

■濕瘡

徐左 濕癩發於遍體。浸淫作癢。延今已久。血虛生熱。生風。脾弱生濕。風濕熱蘊。蒸於脾肺兩經也。姑宜清營祛風。而化濕熱。

淨蟬衣 八分 小生地 四錢 粉丹皮 錢半 肥玉竹 三錢 茯苓皮 三錢

通草 八分 六一散 三錢包 苦參片 錢半 萊豆衣 三錢

(外用皮脂散、麻油調敷)

痔瘡

吳左

外痔焮痛已止。脫肛未收。氣虛不能收攝。陰虛濕熱下注。大腸不清。傳導變化乏力。苔薄膩。脈濡滑。姑宜補中益氣。育陰清化。

米炒南沙參二錢

蜜炙升麻五分

清炙黃芪二錢

炒扁豆衣三錢

硃茯神三錢

水炙桑葉三錢

淨槐米三錢包

生白朮二錢

土炒當歸三錢

杜赤豆一兩

灶心黃土二兩 荷葉包煎湯代水

潘左

外痔焮痛。脫肛便血。氣陰兩虛。大腸濕熱留戀。今宜調益氣陰。清化濕熱。

細生地四錢

粉丹皮錢半

京赤芍二錢

減槐米三錢包

抱茯神三錢

地榆炭三錢

腸連丸一錢包

橘白絡一錢

生苡仁三錢

全當歸二錢

杜赤豆一兩

乾柿餅三錢

(外用黃連膏)

縮腳陰痰

高右 傷筋起見。變為縮脚陰痰。頂雖潰。未嘗得膿。根脚腫硬疼痛。痛引少腹。小溲不利。腑行燥結。身熱晚甚。口有甜味。舌苔薄膩。脈象濡滑。蘊濕宿瘀。凝結厥陰之絡。營衛不從。症屬纏綿。姑擬益氣托毒。化濕通絡。

生黃芪 三錢 茯苓皮 三錢 炙甲片 一錢 清水豆卷 四錢 當歸尾 三錢

福澤瀉 一錢五分 澤蘭葉 一錢五分 光杏仁 三錢 桃仁泥 錢半包 赤芍藥 二錢

通草 八分 象貝母 三錢 蘇木 一錢五分 陳廣皮 一錢

(外用陽和膏、九黃、並用金箍冲和敷其四週)

二診 傷筋起見。變為縮脚陰痰。腫硬疼痛。連及少腹。咳嗽則痛更甚。小溲不利。身熱晚甚。舌苔薄膩。蘊濕凝結厥陰之絡。營衛不從。纏綿之症。再宜和營去瘀。化濕通絡。

清水豆卷 四錢 藏紅花 八分 福澤瀉 一錢五分 通草 八分 當歸尾 三錢

桃仁泥 錢半包 黑白丑 各八分 澤蘭葉 一錢五分 生赤芍 三錢 連皮苓 四錢



炙甲片八分  
 大貝母三錢  
 蘇木一錢五分  
 醒消丸一錢吞服  
 三診 縮脚陰痰。腫硬疼痛。上及少腹。下及腿側。皮色不變。右足曲而不伸。寒熱  
 晚甚。舌苔薄膩。脈弦小而遲。寒濕痰瘀。凝結厥陰之絡。營衛不從。纏綿之症也。今  
 擬陽和湯加減。溫化消解。冀望轉陰爲陽。始能出險入夷。

淨麻黃三分

大熟地四錢二味全搗

肉桂心五分

生草節一錢

炮姜炭五分

銀柴胡一錢

白芥子三錢炒研

鹿角膠二錢陳酒化冲服

醒消丸一錢吞服

Faint, illegible text within a rectangular border, likely bleed-through from the reverse side of the page.

孟河丁氏醫案卷八

膏方案

徐先生 精氣神者。人身之三寶也。論先天之生化。則精生氣。氣生神。論後天之運用。則神役氣。氣役精。人身五藏。各有所藏。心藏神。腎藏精。精藏於腎。而主於心。心君泰然。腎精不動。是爲平人。尊體氣陰兩虧。坎離失濟。心虛易動。腎虛不藏。神動於中。精馳於下。此夢遺舊恙所由起也。遞進膏滋。遺泄漸減。藥能應手。未始無功。惟是補牢已晚。亡羊難復。久遺之後。腎陰大傷。腎者主骨。骨中有髓。腎之精也。腰爲腎之外候。脊乃腎之道路。腎精走失。骨髓空虛。脊痛腰痠。在所必見。肝爲乙木。中寄陽魂。膽爲甲木。內含相火。腎水既虧。豈能涵木。木失所養。水走火飛。相火不能潛藏。肝陽易於上亢。清空不空。則爲頭眩。清竅阻塞。則爲耳鳴。陰虛於下。火浮於上。上實下虛。亦勢所必然矣。症勢各類。治本一途。絜要提綱。補精爲重。補精

必安其神。安神必益其氣。治病必其求本也。壯水以涵其木。滋陰以潛其陽。子虛補母。乃古法也。仍宗前意。再訂新方。補氣安神。育陰固泄。仿乙癸同源之治。為坎離固濟之謀。復入血肉有情。填益精髓。復元精之走失。補奇脈之空虛。為日就月將之功。作一勞永逸之計。是否有當。即正 高明。

臺參鬚 一兩五錢 潞黨參 三兩

大熟地 六兩砂仁拌

炙綿芪 四兩

炒淮藥 二兩

硃茯神 三兩

酸棗仁 三兩

炙遠志肉 一兩 清炙草 六錢

明天冬 二兩

大麥冬 二兩

厚杜仲 三兩鹽水炒

甘杞子 二兩

川斷肉 二兩鹽水炒

桑椹子 三兩

製首烏 四兩

陳廣皮 一兩

仙半夏 二兩

北秫米 三兩炒包寧子 淡 四兩

煨牡蠣 四兩

紫貝齒 四兩

紫石英 三兩

胡桃肉 二十枚鹽水炒去紫衣

五味子 六錢

金櫻子 一兩包

剪芡實 三兩

川黃柏 一兩

熟女貞 二兩

猪脊髓 二十條酒洗

紅棗 四兩

鰾膠 二兩溶化收膏



右藥煎四次。取濃汁。加龜板膠四兩。清阿膠四兩。均用陳酒炖。烱再將鱧膠和入。白文冰半斤。融化收成膏。每早晚各服二匙。均用開水化服。如遇傷風停滯等症。暫緩再服可也。

羅先生始患痔漏。繼則不寐。痔漏傷陰。陰傷及氣。氣陰不足。氣不能配陽。陰虛及陽。故爲不寐。不寐之因甚多。而大要不外乎心腎離中一陰。是爲陰根。陰根下降。是生水精。坎中一陽。是爲陽根。陽根上升。則爲火母。坎離交濟。水火協和。陽入於陰。則爲寐。陽出於陰。則爲寤也。腎陰不足。水不濟火。心火不能下通於腎。腎陰不能上濟於心。陽精不升。水精不降。陰陽不交。則爲不寐。此不寐之本也。肝爲乙木。內寄陽魂。膽爲甲木。內含相火。平人夜臥。魂歸於肝。陽藏於陰也。腎陰虧耗。水不涵木。肝不能藏其陽魂。膽不能祕其相火。神驚火浮。亦爲不寐。此不寐之兼見也。離處中宮。坎居下極。位乎中而職司升降者。脾胃也。胃以通爲補。脾以健爲運。脾失健運。胃失流通。中宮阻塞。不能職司升降。上下之路隔絕。欲求心腎之交。不

亦難乎。故經云胃不和則臥不安。胃不和者不寐之標也。道書云離為長女。坎為少男。而為之媒介者坤土也。是為黃婆。其斯之謂乎。錯綜各說。奇偶製方。益氣以吸陽根。育陰以滋水母。升戊降己。取坎填離。益氣即所以安神。育陰亦兼能涵木。標本同治。以希弋獲。是否有當。即正高明。

清炙綿芪四兩

上潞黨參四兩

大生地四兩

抱茯神三兩 硃砂拌

大熟地四兩

炙遠志肉一兩

清炙草六錢

酸棗仁三兩

仙半夏二兩

北秫米三兩 包

明天冬一兩 五錢

大麥冬一兩 五錢

炒淮藥二兩

甘杞子二兩

生牡蠣四兩

廣橘白一兩

白歸身三兩

大白芍三兩

花龍骨二兩

青龍齒二兩

紫石英三兩

炙鱉甲三兩

川石斛三兩

馬料豆三兩

潼蒺藜三兩

紫丹參二兩

川貝母二兩 另去心研末收膏

製首烏六兩

合歡花一兩 五錢

蓮子二兩

紅棗六兩

雞子黃十枚 另打攪收膏

右藥煎四次。取濃汁。加龜板膠四兩。清阿膠四兩。均用陳酒炖化。白冰糖半。

斤熔化。再將川貝、雞子黃依次加入攪和收膏。每早晚各服二匙。均用白開水沖服。如遇傷風停滯等症，暫緩再服可也。

張先生。每冬必欬。氣急不平。天暖則輕。進寒則甚。此陽虛留飲爲患也。陽爲天道。陰爲地道。人生賤陰而貴陽。經云。陽氣者。若天爲日。失其所。則折壽而不彰者也。素體陽虛。脾腎兩病。腎虛水泛。脾虛濕聚。水濕停留。積生痰飲。年深不化。盤踞成窠。阻塞氣機。據爲山險。上礙肺金。右降之路。下啓衝氣。上逆之機。不降不納。遂爲氣急。飲爲陰邪。遇寒則陰從陽屬。虎借風威。遇暖則陰弱陽強。邪勢漸殺矣。痰飲生源於土濕。土濕本源於水寒。欲化其痰。先燥土濕。欲燥土濕。先溫水寒。書所謂外飲治脾。內飲治腎也。肺主氣。胃爲化氣之源。腎爲納氣之窟。肺之不降。責之胃納。腎之不納。責之火衰。欲降其肺。先和其胃。欲納其腎。先溫其陽。書所謂上喘治肺。下喘治腎是也。症屬陽虛。藥宜溫補。今擬溫腎納氣。溫腎則所以強脾。和胃降逆。和胃功兼肅肺。但得土溫水暖。飲無由生。胃降金清。氣當不逆。氣平飲化。欬

自愈矣。症涉根本。藥非一蹴能治。仿前賢方。乃三思而定。略述病由。以便裁奪。

別直參三兩 雲茯苓四兩 潛於朮三兩 清炙黃芪三兩 清炙草八錢

炙遠志肉一兩 大熟地四兩 川桂枝六錢 五味子八錢 淡乾姜四錢 同搗

熟附塊一兩 川貝母三兩 甜光杏三兩 蛤蚧尾五對 酒洗 砂仁末八錢

范志麩三兩 陳廣皮一兩 仙半夏三兩 旋覆花一兩 五錢包

代赭石四兩 煨 補骨脂二兩 合桃肉二十枚 二味拌炒 炙白蘇子二兩

淮山藥三兩 山萸肉三兩 福澤瀉一兩 五錢 厚杜仲三兩 川斷肉三兩

甘杞子三兩

右藥煎四次。取極濃汁。加鹿角膠四兩。龜板膠四兩。均用陳酒燉烱。白水糖半斤。融化收膏。每早服三錢。臨臥時服三錢。均用開水沖服。如遇傷風停滯等。暫緩再服可也。



孟河丁氏醫案卷八

臨證筆記

先祖立方必詳書脉案舌苔病狀病理辨其陰陽表裏究其經絡藏腑嘗謂濟萬云若此五者缺一不可而於傷寒溫病等類尤當以六經爲最要明證之所在而治之方能切中也。濟萬侍診九載自愧識淺惟遇門診出診之奇險重雜者記而錄之因醫案之刊而附於後俾知先祖用意之所在觸類旁通云爾同孚路余先生之子年方九歲初則出痘繼而瘍癰遍生經前醫投以清涼解毒之劑數十餘劑瘍癰漸愈而形肉日削胃呆不納求治於先祖見其來厲也不能行走環跳膝蓋處浮腫皮色不紅按之亦不痛自云入夜痠脹異常若筋粗強硬之狀診其脈細舌色淡白質絳余先生謂兩房祇此一子承祧宗祀倘有不測奈何奈何先祖云此證乃痘漿未化之毒混處血脉絡間寒涼太過流入陰分且脾胃生生

之氣已受損。健運受納。均失其職。脾虛則生溼。胃弱而生痰。濕痰凝聚。營衛不得流通。症屬流注。流痰之類。所慮者。破潰不斂。則成瘡癆。此時尙可設法。冀其消散也。內服陽和湯。麻黃。熟地。肉桂。炮姜。芥子。生草節。鹿角膠。鹿角霜。加入黨參。白朮。陳皮。紅花。牛膝。半夏。外用自製雙料陽和膏。蓋貼腫處。囑服十劑。迨二次復診。已不用背曳扶持。卽能行走矣。並云。米粥一日可服四碗。視其面色。亦見光華。後改湯爲丸。服半月餘。便愈。因思此證。雖不謂險。謂奇。前後共診兩劑。卽收全功。妙在神速也。

歲在癸亥仲秋。後馬路。益記號。王方娃。延 先祖診治。由其夫人詳述病因。先患吐血。症由初夏起。見方血之來也。盈盞成盆。初服芩。連。生地。知母。石膏。白芍。黃柏。寒涼收瀉之劑。兩帖而血止。未逾五日。忽加咳嗽。改延他醫。謂吐血之後。而見咳嗽者。每易入於損門。當擬滋陰清降之劑。如是者。連服一月餘。罔無効驗。反增喘促。泄瀉。入夜潮熱。形瘦骨立。精神痿軟。醫告技窮。並云。勢將不起矣。 先祖診脉

畢。處方用桑皮、桑葉、茯苓、甘草、桂枝、桃仁、地榆炭、紫菀、欵冬、半夏、苡仁、枇杷葉。囑服三劑。泄瀉漸止。潮熱亦減。但咳而音啞。再以桂枝、地榆、易杏仁、桔梗。服後音聲亦揚。後用培土生金法。山藥、茯苓、白朮、甘草、陳皮、半夏、杏仁等。調理全愈。功成。

濟萬心有所疑。乃問於先祖。蓋病起於吐紅。更加潮熱喘促。明是陰虧火旺之象。

滋陰降火之法。何以不驗而轉劇。先祖云。是證脉來左濡濇。右寸關大。病原因固。

屬於火。而寒涼太過。致離經之血。瘀凝於絡。陽氣被遏。不得流通。氣滯生痰。痰瘀交併。肺氣不利。而咳嗽聲啞。是當溫化去瘀。導血歸經也。脉經云。濇爲氣滯。氣乃血之帥。氣滯則血凝。惟久病中土已傷。脾不健運。故一面去瘀化痰。一面溫脾通陽。至於陰虛火動之潮熱。脉當細數。今右脈滑大。非陰虛之潮熱明矣。且兩足欠溫。兩尺脈弱。寒涼激火而上行。中氣既寒。在上之火。不能下降矣。因知醫不難於用藥。而難於識症。幸也。病痊。否則人必目余爲偏見。又將何辨乎。

徐氏婦。年近三旬。寡居八載。住城內小木橋。於壬戌之春。患四肢腫痛。手掌足跗。

更甚。若觸動之。則痛徹於心。且不能轉側。稍移。如是者十餘日。晝夜呼號。無有定時。延 先祖治。出前方。盡是去風化濕。獨活寄生湯之類。間有用玉屏風散者。服之口並不燥。胸亦不悶。惟腫痛反劇。診其脈。兩手均弦細而數。舌質淡紅。自述痛處覺熱。先祖云。此歷節風也。俗名痛風。立方投桂枝白虎湯加減。而倍石膏。桂枝六分。石膏一兩。知母錢半。大地龍三錢。酒洗。桑枝四錢。囑服兩劑。病勢略減。乃更方。去桂枝。加用羚羊。白薇兩味。又服兩劑。腫消其半。而痛亦十減六七。調理半月。得以全愈。蓋以寡居多鬱。鬱則木失條達之機。肝陰虛。而肝火易熾。火盛化風。特趨入絡。耗傷營血所致。按歷節風一症。有屬寒者。有寒化熱者。有完全屬熱者。攷之金匱。寒者。烏頭湯爲主方。寒初化熱者。桂枝芍藥知母湯。化熱已盛者。後賢借用桂枝白虎湯。若本體陰虛。肝火入絡。病因乃完全屬熱者。則以千金羚羊角散爲最妙。此症卽仿千金法。故而得效。

長浜路候姓。年五十一。孤居已十年矣。病呃逆。醫投丁香。柿蒂。旋覆。代赭。數劑不



愈改延西醫亦無效。乃延先祖診治。時先祖適以出症蚌埠。爲倪督軍治病。乃由濟高代症。按脈洪數有力。右關尤甚。舌根黃膩。面赤如醉。呃聲頻頻不斷。問其大便燥結不行者三四日矣。此乃胃熱移肺。肺不受邪。邪正相拒。呃聲乃作。右關屬胃。胃爲陽土。宜通宜降。土燥便結。出門不通。熱氣不得下行。反從上逆。旋覆代赭。雖能重鎮。不能除熱。熱不去。則呃不止。丁香柿蒂。乃治呃之屬於寒熱夾雜者。尤不對症。故無效驗。因用生石膏五錢。酒製大黃三錢。元明粉二錢。沖肥知母錢半。黃芩錢半。竹葉三十張。枳實錢半。處方既竟。病家以方太峻。有難色。余曰。病者體質陽素有餘。加以孤居亢陽尤甚。面赤雖似戴陽。然脈來洪數有力。實屬胃家實熱。仲聖云。面熱如醉。乃胃熱上沖。加大黃以利之。非虛症可比。雖屬高年。當從實治。此方決無妨碍。病家方敢照方服藥。一劑而腑氣通。再劑而呃逆止。後以調養胃陰。漸漸而愈。

李益平。通州人。販布至申。寓於新旅社二十七號。患少腹痛。痛處有一筋扛起。上

冲則嘔。下墜則利。綿延半月餘。求治於先祖。出前方。有以謂疝氣者。有以謂奔豚者。所服之方。盡屬苦辛通降之劑。病勢仍然不進不退。惟得腹內嚮鳴。有矢氣。則略覺鬆暢。視其面色黑暗。按其脈象濡濇。舌苔灰膩。痛處手不能近。先祖云。此寒瘀爲患。已成積聚矣。久則必爲瘕癖。非大劑溫通不可。乃投以附桂炮姜紅花製軍枳實金鈴子小茴香。並用香附末二兩。食鹽末二兩。酒醋炒熱。以熨其腹痛處。明日又來邀診。謂昨夜服藥之後。腹內响鳴異常。連得矢氣數十。忽而便大瀉。視所出之物。色灰黑而粘膩。其臭難當。共瀉六次。今日病勢已減十之六七。雖作亦微矣。因更方去製軍炭枳實。加砂壳八分。延胡索一錢。再服二劑。痛果全止。後調理旬餘而痊。蓋以其人未病之前。宿娼者數次。且喜服水菓。所以有寒瘀之積聚也。

劉左

腎精下損。乏陰液以上承。浮陽上灼。咽痛不腫不紅。妨於嚙食。加以咳嗽喘促。是下焦丹田不司收納。衝脉之氣上逆所致。前醫疊投涼潤。不下五十餘劑。

反而胃弱便溏脉濡小則知中土已緩生氣不振矣。又豈治咳嗽之可療哉。故雖屬治咳之良法實爲釀病之禍端也。今仿勞怯不復當以固真扶胃亦培土生金之意冀望加穀則吉。

潞黨參三錢

淮山藥三錢

雲茯苓三錢

廣橘白一錢

生甘草六分

枸杞子二錢

五味子三分

生白朮三錢

川象貝各二錢

熟穀芽四錢

香稻葉露

一斤煎湯代水並每日另服四兩代茶

二診 服藥十五劑便溏結納穀亦增喘雖平而咳未止脈仍濡軟咽痛稍瘥中宮得運胃氣得醒矣肺津尙未能輸佈甘能生津仍宗前法倘逐步轉機或可許效。

此證乃鎮江劉姓慕

先祖名而來申診治者共診三次服藥四十餘劑便

告全功因知久病勞損扶養中土爲第一要法所謂人以胃氣爲本得穀自

昌孫濟萬誌





跋

內經詳鍼灸。至伊尹始煎湯液治病。南陽張仲景。精闡而明辨之。醫道大彰。所著一百一十三方。有非此方不能治此病。非此藥不能成此方之妙。後世醫家。莫不奉爲圭臬。而後賢著作之外。復刊行醫案。殆參仲師之成法。奏利濟之膚功。所以徵古而信後也。先嚴懸壺海上。垂四十年。活人隆譽。溢於婦孺之口。母容元彥

縷述。惟平日視診紛煩。無暇著作。所有歷年醫案。爲門弟子鈔存者。彌堪珍寶。竊

緬先嚴逝世。瞬已年餘。海內明德之士。往往垂詢。先嚴身後。有無著作刊行。

元彥惟惶惟恐。不知所對。爰將先嚴手訂喉痧症治概要。首付剞劂。至先嚴

歷年臨診醫案。由長姪濟萬彙編刊刻。全書爲卷八。爲目四十二。附以外科方案。

別爲一冊。留先澤於世間。示後人以階梯。元彥等不肖之愆。或可稍減已乎。時在

民國十六年丁卯仲冬月次男元彥謹識

另圖十六乎... 卷民宗民 元生 龜編

眼目一... 示於人以訓... 善不肖之... 慈惠... 日... 和...

... 致... 兼... 既... 全... 皆... 爲... 悉... 人... 益... 目... 四... 十... 二... 制... 以... 於... 務... 式... 案...

... 不... 取... 既... 獲... 探... 央... 選... 年... 信... 知... 喚... 靈... 帝... 辦... 要... 首... 於... 隨... 順... 正... 一... 乘... 運...

... 與... 乎... 翁... 翁... 內... 即... 勝... 之... 七... 卦... 卦... 鼎... 鼎... 伏... 運... 變... 變... 皆... 無... 善... 行... 既... 行...

... 眼... 辨... 別... 卷... 許... 視... 官... 想... 半... 醫... 案... 爲... 門... 故... 于... 始... 終... 皆... 無... 誤... 實... 驗...

... 士... 聖... 四... 十... 翁... 人... 到... 聖... 翁... 氣... 機... 體... 之... 口... 罪... 容... 元...

... 之... 長... 壽... 既... 百... 擲... 家... 欲... 益... 中... 驗... 之... 效... 甚... 殊... 勝... 之... 神... 效... 也... 以...

... 非... 此... 夫... 不... 論... 皆... 此... 藥... 不... 離... 氣... 血... 之... 妙... 妙... 世... 醫... 案... 莫... 不...

... 南... 關... 關... 中... 長... 壽... 關... 而... 固... 之... 醫... 案... 太... 壽... 德... 善...

...

跋

先祖沒之二年。濟萬始將思補山房醫案四卷付梓。並泣誌於卷尾曰。自

先祖離鄉井。僑寓滬濱。數十年來。醫名被浦江南北。病者既爭延頌。醫家又以得獲方案抄傳爲幸。辛酉冬。中醫學會成立。濟萬爰請命

先祖。謹輯方案付刊雜誌。以期有慕先祖名而不得列於門牆者。得之亦足以觀摩。忻賞焉。乃所輯未成完璧。而

先祖遽於昨歲棄養。門生故舊。嗟嘆之餘。因囑濟萬續事選輯。俾成全豹。既從事告竟。卽付削青。蓋不特感門生故舊之誼。亦以告慰

先祖天上之靈也。夫濟萬少侍先祖讀醫籍。先後臨證十二年。雖日親夕炙。而以賦性魯鈍。所獲不能得先祖十之半。今者書齋依舊。遺硯猶存。回憶趨庭。永不可再。披對斯集。不知涕淚之橫流矣。嗚呼。

丁卯十一月長孫男濟萬謹誌

...

...

...

...

...

...

...

...

...

...

...

...



孟河丁甘仁先生著

喉痧症治概要

吳興玉題





沈新山先生

蘇定得君贊

沈新山先生

李序

攷喉痧一症。古無是病。亦無是書也。張石頑醫通。始列痲疹門。稱手太陰足陽明。蘊熱所致。其症之危。有甚於痘者。雖未明言疫喉爛喉等症。要爲喉痧書之。濫觴葉香巖醫案。稱雍正癸丑以來。有爛喉痧。投以犀羚苓連梔膏之類。輒至不治。進解肌散表。多有生者。此於爛喉痧症治。洵爲精確。然又未聞有白喉之說也。至鄭梅澗重樓玉鑰。辯明白喉。立養陰清肺方。而喉科治法始備。是症多發於北省。旋蔓延南方。尤以滬上爲甚。機廠林立。烟煤薰蒸。實足醞釀喉症。症發難治。怒焉堪憫。孟河丁甘仁先生。精岐黃。治喉症。効更如神。懸壺海上。三十餘載。余與交最久。知最深。去夏。先生歸道山。冬。滬濱各醫團善堂。開會追悼。余略有演述。悼故人。亦歎醫道之中衰也。先生著有喉痧概要一書。細別痧喉種類。察其在氣在營。分初中末三期。施表清下諸法。集諸家之大成。作度人之金針。誠醫林盛事也。今其令嗣仲英。將刊以行世。乞余序文。因略溯喉症之發源。并感近年喉症之盛行。先生





夏序

時疫喉痧。危險之症也。蔓延傳染。貽害無窮。其原因於時厲溫邪。吸自口鼻。內應肺胃。故治法與白喉不同。白喉忌表。誤汗則殆。疫喉宜表。有汗則生。固不可不審慎也。孟河丁甘仁先生。予金蘭友也。學術湛深。經驗宏富。於疫喉一門。研究有素。將其生平之學識。歷年之經驗。編成一書。是書大旨。辨症以分氣營。爲要務。治法以汗清下爲先後。議論正確。用藥審慎。考古證今。堪稱全璧。拜讀之下。深獲我心。詎料先生於去年遽歸道山。我道頓失一柱石。甚可痛也。今其哲嗣仲英譜姪。箕裘克紹。亦有聲於時。不忍以先人之手澤。秘之枕中。擬付剞劂。以公諸世。固不第爲後學之金針。亦病家之寶筏也。爰誌數言。以弁其首。

民國十六年歲在丁卯重九應堂弟夏紹庭序于椿萱草堂



張序

名者實之賓也。自來享盛名者。斷無倖致。故曰實至則名歸。孟河丁公甘仁。邃於醫。行道滬上。垂四十年。雖婦人孺子。咸知先生名。余於壬戌。執教鞭於中醫專校。始識先生。與之談論。和藹可親。一望而知爲有道之士。無何。余以事離滬。凡六載。而先生遽歸道山。今春。承哲嗣仲英君招。命諸少君承授醫學。是年秋。仲英君將以令先翁所著喉痧證治概要付劂。問序於余。余曰。中國醫學之所以日見其衰頹者。非學識之不足也。患在無統系。無統系。則不能提綱而挈領。探本以尋源。周秦以降。醫皆分科。泰西醫學。分門尤細。後世將內外二字。一人概括之。夫人之精神有限。學識有限。而病之千變萬化。顧可以數十年之學習。遽能統爲之治哉。壬寅春。喉疫盛術。時醫狃於白喉忌表。一味滋降寒涼。死者無數。而不知喉痧由於風火不鬱於肺胃。痰熱不積于陽明。宜辛涼疎解。透毒化痰也。先生亟爲校正。一面憑其心得。用方藥以活人。一面釐訂專書。訓後學以正謬。其功豈淺鮮哉。憶

唯疾症治權要  
余于乙卯歲會輯楊龍九囊秘喉書刊于紹興醫報爲社會所許近閱斯篇則專  
詳喉痧辨別詳細言言金玉字字珠璣先刊于中醫雜誌已爲社會重視今訂單  
本我又知其必紙貴洛陽也從茲先生之名永不朽矣要皆實至而名歸耳後之  
學者勉乎哉時在

民國十六年丁卯歲冬月海虞張謇汝偉謹撰



王序

咽喉方寸之間。飲食由是而進。呼吸由是而轉。一日不進食則飢。呼吸有窒礙則病起。古謂事之重要者曰扼其咽喉。喉之爲義大矣哉。經云。咽主地氣。喉主天氣。咽通於胃。喉通於肺。咽喉爲肺胃之門戶。而肺胃又各有其氣化。每逢氣候乖常。風寒燥火之邪。襲於肺胃。釀成重險之喉痧。其勢最緊急。其病易傳染。因斯斃命者。不可勝計。推厥原由。皆因醫者不明病源治法。以至於此。嗚呼。人生實難。誤死堪悲。醫之存心。宜宏其惻隱之量。擴其濟世之懷。好行其德。庶乎不愧爲醫。丁師甘仁。精擅內外喉科。經其治愈疑難之症。奚啻萬千。而於喉痧症治。有獨到之秘。今哲嗣仲英君刊印師著喉痧症治概要一書。理法且詳。功效神妙。已刊登中醫雜誌第一期。風行遠近。今以單本發行。有裨於喉痧之治療者。功德靡涯。我師濟世之心。固可垂諸不朽。而仲英君擴充其濟世之量。所謂克紹箕裘。得傳家學。云云。固不足以彰其美也。然吾尤有言者。著書難。讀書亦不易。丁師之論喉痧活法。

也。倘讀者不善體會。以陰虛白喉為疫喉。以陽明實熱為喉痧。施以清解之劑。若此者。似是而非。必致貽誤蒼生。丁師固不任其咎。且負仲英君刊是書之初旨矣。是為序。

民國十六年歲次丁卯秋月門人皖歙王一仁拜撰

王君

# 喉痧症治概要目錄

時疫爛喉痧痲正痧風痧紅痧白喉總論

時疫喉痧門方

解痧透肌湯 加減麻杏石甘湯 加減升麻葛根湯 加減黑膏湯 涼營清氣湯  
加減滋陰清肺湯 敗毒湯 加減竹葉石膏湯

吹藥

玉鑰匙 金不換 加味珠黃散 錫類散 外貼異功散

痧毒敷藥

三黃二香散 冲和膏 紫金錠(卽玉樞丹)

驗案 十一則

錄慈谿邵琴夫先生喉痧有爛喉白喉之異論

錄元和金保三先生爛喉痧輯要說

葉天士先生爛喉痧醫案錄爛喉痧毒經驗闡解

論症 六則

論症續要 六則

要方備查 荆防葛根湯 升麻葛根湯 托裏舉斑湯 逐邪煎 藿香正氣散 申字漱喉散 辰字探吐

方 一字法 刺法 急治法

知悉玉尚海要目錄



# 喉痧症治概要

孟河丁澤周甘仁輯

男元彥仲英校

時疫爛喉痧瘋正痧風痧紅痧白喉總論

時疫喉痧由來久矣。壬寅春起。寒暖無常。天時不正。屢見盛行。予臨診二十餘年。於此症略有心得。爰述其大概。與同志一商榷之。凡痧癘種類甚多。有正痧。有風痧。紅痧。惟時疫喉痧爲最重。傳染迅速。沿門闔境。竟有朝發而夕斃。夕發而朝亡者。暴厲夭札。殊深浩歎。業是科者。當謹慎而細察。悉心而辨治焉。如幼時初次出痧。謂之正痧。因胎中有伏熱。感時氣而發。寒熱咳嗽。煩悶泛噁。咽喉或痛或不痛。卽有咽痛。亦不腐爛。此正痧之病形也。夏秋時之紅痧風痧。初起時。寒熱骨痛。胸悶嘔噁。舌苔白膩。外熱極重。而裏熱不盛。咽喉不痛。或咳嗽。或不咳嗽。此紅痧風痧之病情也。其病源良由夏受暑濕。秋感涼邪。鬱於太陰陽明。太陰者肺也。陽明

者胃也。肺主皮毛。胃主肌肉。邪留皮毛肌膚之間。則發爲紅痧風痧。凡痧子初發時。必有寒熱咳嗽。胸悶泛噁。骨痛等證。揆度病因。蓋外邪鬱於腠理。遏於陽明。肺氣不得宣通。胃氣不得泄越也。必用疎散之劑。疎表解鬱。得汗。則痧癘透。而諸症俱解。此治正痧風痧紅痧之大略也。獨稱時疫爛喉痧者何也。因此症發於夏秋者少。冬春者多。乃冬不藏精。冬應寒而反溫。春猶寒禁。春應溫而反冷。經所謂非其時而有其氣。釀成疫癘之邪也。邪從口鼻入於肺胃。咽喉爲肺胃之門戶。暴寒束於外。疫毒鬱於內。蒸騰肺胃兩經。厥少之火。乘勢上亢。於是發爲爛喉痧。痧與痧略有分別。痧則成片。痧則成顆。其治法與白喉迥然不同。白喉忌表一書。立滋陰清肺湯。原宗仲聖豬膚湯之遺意。由少陰伏熱升騰。吸受疫癘之氣。與內蘊伏熱相應爲患。若至音啞氣喘。肺炎葉腐。危在旦夕間矣。滋陰清肺。尙恐不及。宜加珠黃金汁。或救十中一二。苟與表散。引動伏火。增其炎症之勢。多致夭枉。此時疫喉痧。當與白喉分別清楚。不容稍混也。白喉固宜忌表。而時疫喉痧初起。則

不可不速表。故先用汗法。次用清法。或用下法。須分初中末三層。在氣在營。或氣分多。或營分多。脈象無定。辨之宜確。一有不慎。毫釐千里。初則寒熱煩躁嘔噎。咽喉腫痛腐爛。舌苔或白如積粉。或薄膩而黃。脈或浮數。或鬱數。甚則脈沉似伏。此時邪鬱於氣分。速當表散。輕則荆防敗毒。清咽利膈湯。去硝黃。重則麻杏石甘湯。如壯熱口渴煩躁。咽喉腫痛腐爛。舌邊尖紅。絳中有黃苔。痧痧密布。甚則神昏譫語。此時疫邪化火。漸由氣入營。卽當生津清營解毒。佐使疎透。仍望邪從氣分而解。輕則用黑膏湯。鮮石斛。豆豉之類。重則犀豉湯。犀角地黃湯。必待舌色光紅。或焦糙。痧子布齊。氣分之邪已透。當用大劑清營涼解。不可再行表散。此治時疫喉痧用藥之次第也。假使早用寒涼。則邪遏在內。必至內陷神昏。或泄瀉等症。致成不救。如表散太過。則火炎愈熾。傷津劫液。引動肝風。發爲癩厥等險象。仍當大劑清營涼解。或可挽回。先哲云。痧痧有汗則生。無汗則死。金鍼度人。二語盡之矣。故此症當表則表之。當清則清之。或用釜底抽薪法。亦急下存陰之意。諺云。救病如

救火走馬看咽喉。用藥貴乎迅速。萬不可誤時失機。此症有不治難治數條。開列於左。

脈伏者不治。泄瀉不止者不治。會厭腐去。聲啞氣急者不治。始終無汗者難治。痲痧遍體雖見。而頭面不顯者難治。此皆時疫喉痧危險之症。其餘用藥得宜。雖重亦可挽回。此不過言其大略耳。其中變化條目甚多。非數言可盡。敢請海內明達。匡我不逮。則幸甚矣。

### 喉痧自訂方

#### (一)解肌透痧湯

專治痧痲初起。惡寒發熱。咽喉腫痛。妨於嚥飲。遍體痠痛。煩悶泛噁等症。(痧痲見咳嗽爲輕。無咳嗽爲重)

荊芥穗

錢半

淨蟬衣

八分

嫩射干

一錢

生甘草

五分

粉葛根

二錢



熟牛蒡 二錢

輕馬勃 八分

苦桔梗 一錢

前胡 錢半

連翹壳 二錢

炙僵蠶 三錢

淡豆豉 三錢

鮮竹茹 二錢

紫背浮萍 三錢

如嘔噦甚。舌白膩。加玉樞丹四分冲服。

(二) 加減麻杏石甘湯

專治痧癘不透。憎寒發熱。咽喉腫痛。或內關白腐。或咳嗽氣逆之重症。

淨麻黃 四分

熟石膏 四錢

象貝母 三錢

鮮竹葉 三十張

光杏仁 三錢

射干 八分

炙僵蟲 三錢

白蘿菔汁 一兩

生甘草 六分

連翹壳 二錢

薄荷葉 一錢

京元參 錢半

(三) 加減升麻葛根湯

專治痧癘雖佈。而頭面鼻獨無。身熱泄瀉。咽痛不腐之症。

川升麻 五分

生甘草 五分

連翹壳 二錢

炙僵蠶 三錢

粉葛根 錢半

苦桔梗 一錢

金銀花 三錢

乾荷葉 一角

薄荷葉 八分

京赤芍 二錢

淨蟬衣 八分 陳萊菔 三錢

(四) 加減黑膏湯

專治疫邪不達。銷燦陰液。痧痲佈而不透。發熱無汗。咽喉腫紅。燥痛白腐。口渴煩躁。舌紅絳起刺。或舌黑糙無津之重症。

淡豆豉 三錢 薄荷葉 八分 連翹壳 三錢 炙僵蠶 三錢 鮮生地 四錢

熟石膏 四錢 京赤芍 二錢 淨蟬衣 八分 鮮石斛 四錢 生甘草 六分

象貝母 三錢 浮萍草 三錢 鮮竹葉 三十張 茆蘆根 各一兩

(五) 涼營清氣湯

專治痧痲雖佈。壯熱煩躁。渴欲冷飲。甚則譫語妄言。咽喉腫痛腐爛。脈洪數。舌紅絳。或黑糙無津之重症。

犀角尖 五分 磨沖 鮮石斛 八錢 黑山梔 二錢 牡丹皮 二錢 鮮生地 八錢

薄荷葉 八分 川雅連 五分 京赤芍 二錢 京元參 三錢 生石膏 八錢

生甘草八分 連翹殼三錢 鮮竹葉三十張 荊蘆根各一兩 金汁一兩沖服

如痰多加竹瀝一兩沖服。珠黃散每日服二分。

(六)加減滋陰清肺湯

專治疫喉白喉。內外腐爛。身熱苔黃。或舌質紅絳。不可發表之症。

鮮生地六錢 細木通八分 薄荷葉八分 金銀花三錢 京元參三錢

川雅連五分 冬桑葉三十張 連翹殼三錢 鮮石斛四錢 甘中黃八分

大貝母三錢 鮮竹葉三十張 活蘆根一兩去節

如便閉加生川軍三錢。開水泡絞汁沖服。

(七)敗毒湯

專治痧癩未曾透。項頸結成痧。毒腫硬疼痛。身熱無汗之證。

荊芥穗錢半 薄荷葉一錢 連翹殼三錢 生蒲黃三錢 熟石膏四錢

炒牛蒡二錢 象貝母三錢 益母草三錢 生甘草六分 京赤芍三錢

灸疆蠶三錢

板藍根錢半

如大便泄瀉。去牛蒡石膏。加葛根黃芩黃連。此肺胃疫毒。邪熱移於大腸也。如初病泄瀉。可仿喻氏逆法。以挽舟之法。荆防敗毒加減。如挾食滯。可加查曲之類。亦不可執一而論。

(八)加減竹葉石膏湯

專治痧癘之後。有汗。身熱不退。口乾欲飲。或咽痛蒂墜。咳嗽痰多等症。

青竹葉三十張

桑葉皮各錢半

金銀花三錢

鮮葦莖一兩去節 熟石膏三錢

光杏仁三錢

連翹壳三錢

白蘿蔔汁一兩 生甘草六分

象貝母三錢

冬瓜子四錢

喉痧選用效藥

(一)吹藥



玉鑰匙 治一切喉症腫痛白腐。將此藥吹之。能退炎消腫。惟陰虛白喉忌用。

西瓜霜五錢 西月石五錢 飛硃砂六分 疆蠶五分 冰片五分

研極細末

金不換 功效較玉鑰匙尤勝。治疫喉。生肌長肉。方如左。

玉鑰匙加料

人中白三錢 青黛三錢 西黃三錢 珠粉三錢

加味珠黃散 治喉症立能消腫止疼。化毒生肌。

珠粉七分 西黃五分 琥珀七分 西瓜霜一錢

錫類散 治一切喉痧喉疖。腐爛作痛。痰涎甚多。渴飲難下。此散吹入。能豁痰

開肺。去腐生新。

象牙屑四分 壁錢三十個 西黃七厘 冰片五厘 青黛七分

人指甲七厘 珠粉四分

以上吹藥。研細末貯瓶。勿令出氣。

(二) 外貼藥

貼喉異功散 治喉症腫痛。用太乙膏上藥少許。貼人迎穴。半日起泡。即揭去。

斑毛 四錢

血竭 六分

乳香 六分

沒藥 六分

全蝎 六分

元參 六分

射香 三分

冰片 三分

斑毛去頭翅足。用糯米拌炒。以米色微黃為度。除血竭外。合諸藥共研細末。另研血竭。拌勻。磁瓶收貯。勿令出氣。

(三) 敷藥

三黃二香散 清火解毒。用菜油調敷。

大黃 二兩

蒲黃 一兩

雄黃 二錢

射香 三分

冰片 三分

冲和膏 消腫止痛。用陳醋白蜜調。燉溫敷。

紫荊皮 五兩

獨活 三兩

白芷 三兩

赤芍 二兩

石菖蒲 兩半

紫金錠（卽玉樞丹）消腫解毒用陳酒磨敷。

山慈菇二兩

川文蛤（卽五倍子槌破洗刮內桴）二兩

紅大戟一兩

當門子三錢

千金子二兩

### 喉痧診治驗案

#### （一）溫邪喉痧

陳右年三十餘歲。住紫金橋。患喉痧六天。痧佈隱隱。壯熱汗洩不多。口渴咽喉腐爛。湯飲難進。數醫不效。舉室傍徨。邀余診治。診其脈洪數。視舌色前半紅絳。中後薄膩而黃。余曰。此溫疫之邪化熱。半以入營傷津。半以蘊蒸氣分。擬清營解毒。清氣達邪之劑。犀角地黃湯合竹葉石膏湯。加荊芥薄荷。複方治之。數劑而愈。

#### （二）爛喉疔痧

王左年二十歲。本丹陽人。客居滬上。患爛喉疳痧甚重。疳痧雖佈。壯熱不退。煩躁不寐。湯飲難嚥。且是新婚之後。陰液早傷。疫火充斥。合家老幼。焦灼萬分。延余診治。病已七天。診脈弦洪而數。舌紅絳起刺。余曰。此溫疫之邪。化火入營。傷陰劫津。內風欲動。勢將痰湧氣喘。危在旦夕間矣。隨用犀角地黃湯。合竹葉石膏湯。加陳金汁。竹瀝珠黃散等藥。數日而痊。

(三)時疫喉痧熱入心包

夏童揚州人。居美租界陳大弄。患時疫喉痧五天。疳痧雖已密佈。而頭面鼻部俱無。俗云。白鼻痧。最爲兇險。曾經服過疏解藥數帖。壯熱如焚。煩躁譫語。起坐狂妄。如見鬼狀。彼家以爲有祟爲患。余診其脈。實大而數。舌紅唇焦。咽喉外內關均已腐爛。滴水難嚥。余曰。此疫癘之邪。化火。陽明腑熱。薰蒸心包。逼亂神明。非鬼祟也。雖頭面鼻部不見痧顯。非升麻葛根可治。隨用犀角地黃湯。合白虎湯。加硝黃之品。一面生津清營。一面釜底抽薪。服後過數時。得大便。即能安睡。



次日去硝黃。照原方加金汁、竹油、珠黃散。服數劑。即熱退神清。咽喉腐爛亦去。不數日而告痊矣。

(四) 喉痧寒熱無汗痧癩隱約

顧左年三十餘歲。在滬南開設水菓行。患喉痧七天。寒熱無汗。痧癩佈而隱約。咽喉腫痛。牙關拘緊。甚則夢語如讖。診其脈鬱數不揚。視舌色薄膩而黃。余曰。此疫邪將欲內陷。失表之症也。急進麻杏石甘湯。得暢汗。痧癩滿布。熱解神清。咽喉腫紅亦退。數日而安。

(五) 寒束溫邪痧癩不透

李右年四十餘歲。南京人。住滬城老北門內。因侍他人之喉痧。而隨傳染。發熱五六天。痧癩布而不勻。咽喉腫痛。牙關拘緊。前數醫意謂此婦素體陰虧。僅用元參、薄荷、桑、丹、茅、蘆根等。方藥平淡。而咽關腫閉益甚。喉中痰聲漉漉。滴水難下。殊屬危急。余診其脈鬱數不揚。舌不出關。苔薄膩黃。問其便數日不行。余曰。

此溫疫之邪。爲外寒所束。痰熱交阻。膈中壅塞。肺胃之間。危在旦夕。隨投透痧解毒湯。加六神丸。涼膈散。竹瀝。白蘿菔汁等。解其表邪。通其腑氣。一日兩劑。服後得汗與便。外以香菜煎水。揩其肌膚。以去外束之寒。次日痧佈。喉關漸開。數日而愈。

(六) 咽喉腫痛白腐痧佈身熱

王右喉痧一候。痧癘漸佈。咽喉腫痛白腐。身熱。口舌前半淡紅。中後膩黃。脈濡數而滑。胸悶泛噁。煩躁懊懣。閱前方。辛涼清解。尙屬平穩。不過方中有元參茅蘆根等。據述服後胸悶泛噁。煩躁懊懣。更甚於前。頗覺難以名狀。余曰。此痧癘未曾透足。疫癘之邪。鬱遏肺胃。不得泄越於外。痰滯交阻中焦。濁垢不得下達之故。仍用透痧解邪。加滌痰導滯之品。如枳實。竹茹。玉樞丹。服二劑。始得痧點透至足心。嘔噁煩躁隨定。熱退。喉腐亦漸漸脫去而愈。但元參茅蘆根小小寒涼。不可早用。若大寒大涼之劑。可不慎之又慎乎。

(七)白喉兩關腐爛

葉女住白克路。白喉四天。咽喉左右兩關腐爛。蒂丁且去其半。身熱不壯。舌質淡紅。中後薄黃。脈象濡數。四日之中。粒米未入。余曰。此疫癘之邪。熏蒸肺胃。心肝之火內熾。用滋陰清肺湯。加川連。通草。一劑。咽喉腐爛漸脫。反覺熾痛。余曰。此腐爛雖去。新肉未生。故熾痛也。仍用原方。加花粉。鮮石斛。因未大便。加生川軍三錢。開水泡。絞汁冲服。得大便甚暢。胃熱下行。白喉隨愈。肺與大腸爲表裏。腑熱下達。肺火亦從下降矣。

(八)白喉腐爛身壯熱煩悶口渴

葉右住澄衷學校。白喉六天。身熱甚壯。咽喉腐爛。湯飲難進。煩悶口渴。連進辛涼清解。毫無應效。意謂此婦因侍其夫喉痧。而得此疾。深恐其亦出痧癘。未敢驟用滋陰清降。渠發熱更甚。煩躁不安。起坐如狂。甚則譫語妄言。咽喉滿腐。蒂丁去其大半。舌灰黃。唇焦。脈洪數有方。一派炎炎之勢。有瘡厥之象。遂投大劑。

犀角地黃湯。合竹葉石膏湯。一日夜進四劑。卽熱退神清。咽喉腐爛亦脫。三四日卽愈。此疫癘之邪。由口鼻而直入肺胃。疫邪化火。由氣入營。傷津劫液。內風欲動。危險之至。得慶更生。亦可謂幸矣。可見有痧癩而喉不腐者。有之。有喉腐而不出痧癩者。亦有之矣。

(九) 喉痧壯熱畏寒滴水難嚥

傅左住塘山路。年廿餘歲。患喉痧八天。壯熱無汗。微有畏寒。痧癩隱約。佈而不顯。面色紫暗。咽喉腫腐。滴水難嚥。煩躁泛噁。日夜不安。傅氏數房。僅此一子。老母少妻。哭泣求救。余曰。症雖兇險。正氣未敗。尙可挽回。診其脈鬱數不揚。舌苔膩黃。閱前服之方。竟是滋陰清肺湯等類。隨投透痧解毒湯。加枳實竹茹。一日夜服兩劑。兼刺少商出血。開閉洩火。服藥後。卽得暢汗。痧癩漸布。面色轉紅。咽喉腫腐亦減。連進數劑。三四日卽愈。喉痧之症。有汗則生。驗之信然。

(十) 爛喉痧癩色紫暗邪陷三陰



劉右年廿餘。住美租界靶子路。患喉痧四天。痧痲雖佈。痲色紫暗。發熱煩燥。夢語如譫。咽喉腫腐。不能嚥飲。適值經臨之際。前醫以其熱壯神糊。早投清涼。鮮生地。鮮石斛。茅蘆根等。據述卽腹中絞痛。少腹結塊。大便溏泄。壯熱卽衰。痧點卽隱。讖語撮空。牙閉拘緊。痰多氣粗。邀余往診。其脈空數無神。亦不能視其舌色。余曰。此溫疫之邪。已陷入三陰。血凝毒滯。殘陽欲絕。無藥可救。果於是晚而歿。早投寒涼。百無一生。過用疏散。尙可挽回。益信然也。

(十一) 喉痧腹瀉頸項腫痛成毒

周童住中法學堂後面。患喉痧八天。痧雖布而未透足。熱勢不退。喉關腫腐。頸項左右腫硬疼痛。欲成痧毒。加之泄瀉。苔黃脈滑數。頗有內陷之象。擬葛根黃芩黃連湯。服後卽得汗。熱減泄瀉卽止。而痧毒腫硬益甚。喉關腫腐不脫。湯飲難進。用敗毒湯。去牛蒡。加元參。並外敷藥。痧毒卽消。咽喉腫腐亦去。數日而安。余行道數十年。診治爛喉痧痲之症。不下萬餘人。僅錄十數案於左。汗清下三法。

皆在其中。讀者宜細心揣摩。庶能獲益。內經云。知其要者。一言而終。不知其要者。流散無窮。信不誣也。

錄慈谿邵琴夫先生喉痧有爛喉白喉之異論

喉痧一證。皆因溫疫之氣。由口鼻吸入。直犯肺胃。流行經絡。蘊而為患。上竄肺系。  
(喉名肺系)則腫痛。(外治異功散)外治蒜泥拔毒散。爛喉白喉。皆可按法施治。  
(外達皮膚)為痧疹。而醫者治法。或從宣解。或從降化。往往有效有不效。虛實之間。不可不早辨也。試先就爛喉論之。其證多發於冬春之間。良由冬不藏陽。無水少雪。溫邪為寒所束。初起形寒頭疼。胸悶鼻塞。噴嚏咳嗽。發熱泛噁。脈來濡細。或現浮洪。渾身痠痛。(火為寒鬱)邪熱由氣分而達血分。(咽喉赤腫)或旁見白點亦見之。(宜乘勢表散)取火鬱發之之義。其有頸之兩旁腫出如甕者。即俗所謂喉痧袋是也。宜加解毒退腫之品。(僵蠶赤芍嫩射干輕馬勃生甘草貝母櫻桃核青線紗線)外用冲和趕毒散。方見外科。用桂枝一錢。附子七分。煎水入陳酒

宣字宜易透字  
降字宜易清字  
甘仁誌

調塗其上。以手巾圍裹。如嫌乾燥。作痛。可入蜂蜜同調。卽潤。其有顏若渥丹。痧不出肌者。乃風寒外束。皮毛密閉也。亦有餘處皆見。面部獨否者。卽俗呼爲白面痧。白鼻痧也。〔陽氣從上頭面愈多者吉〕總宜發散開達。再加發表透邪之劑。〔西河柳鮮。芫荽紫背萍。或煎湯熨之。悶痧可用〕俟其汗暢。〔是症有汗則生無汗則死〕痧透。〔粒細而紅密布無閒〕邪從外洩。胸悶漸舒。喉痛卽輕。倘執內經諸痛屬火。紅腫爲熱。而用苦寒抑遏。〔清火適以動火〕或佐辛涼疎散。以爲雙解之法。必致痧不透達。喉卽腐爛。懸癰白腐。壯熱譫語。肌膚無汗。齒鼻流血。舌縮唇焦。氣促痰升。音啞口噤。驚癇泄瀉。發瘧發厥。邪從內竄。命歸泉路。至於白喉。乃陰虛之體。適值燥氣流行。〔陰被熱灼〕或多食辛辣。過食煎炒。熱伏於胃。〔陽明有餘。少陰不足〕胃失降令。上逼於肺。〔肺之灼由於胃之蒸〕初起脈象浮緊。〔肺氣虛損未形〕發熱。〔鬱勃之火。全集肺胃〕惡寒。〔火極似水〕頭疼背脹。神疲骨楚。喉中或極痛。或微痛。或不痛。而覺介介如梗狀。〔此時熱毒



內盛氣化不宣。有隨發而白隨現者。有至二三日而始現者。（此症喉中一白寒熱自除。）或白點白條白塊。漸至滿喉皆白。如粉皮樣者。（乃肺虛見本象也。）此症多見於小兒。想雛年純陽。陰氣未足。肺更嬌嫩也。且格外強躁。不令細視者。以心肺相通。肺熱熾甚。心氣不寧也。治法宜以滋清爲主。若見胸脘脹悶者。佐以掃除其中。搜便閉塞者。佐以開導其下。（客歲楊士章夫人患喉症。誤表增劇。投以養陰清肺湯而痊。於此可見一斑。邵彭壽母甲午秋患喉症。投大承氣湯而愈。此釜底抽薪法也。）則或發痧疹。（邪從外泄。）或便黏痰。（邪從下洩。）可冀霍然。昧者妄投辛散。猶天氣旱亢。非雨不潤。煽之以風。則燥更甚。迨肺陰告竭。腎水亦涸。遂令鼻塞音啞。痰壅氣喘。咽乾無涎。白塊自落。鼻孔流血。面唇皆青。惡候疊見。難爲力矣。是故猶是風熱。（爛喉白喉。總名喉痧。）有因風而熱者。風散則火自熄。（爛喉所以宜外解也。）有因熱而生風者。熱退則風自滅。（白爛所以宜內清也。）古人治法。一則曰升陽散火。一則曰滋陰降火。豈兩端其說。以生



後人疑竇哉。外因內因。不容混也。

琴夫茂才邵大年先生之孫。痧痘聖手也。悉心醫學。無微不至。在滬時常與余討論。良深佩服。今讀白喉爛喉論。分浙應表忌表各治法。實爲當世良醫。洵爲後起之秀。滬地人烟稠密。蘊鬱之氣必甚。非比北地亢燥之氣。故患爛喉多而白喉少。若將白喉之方。以治爛喉。貽害非淺。至於果患白喉。理應清潤。臨診亦不可不察耳。倘邵君在滬。定能挽回陋習。滬地人命。決不遭如此大劫也。

滬濱聾道人張驤雲評

琴夫先生論喉痧應表。有汗則生。白喉忌表。誤表則危之說。確切病情。洵醫家不易良箴。余讀其論。如見其人。誠兒科中之妙手也。謹錄之。爲後學之津梁。

孟河思補山房丁甘仁識

錄元和金保三先生爛喉痧輯要說

爛喉痧。至危之症也。寒暖非時。染成厲毒。一鄉傳染相同。卽是天行之瘟疫也。

與尋常咽喉通行痧疹俱迥然不同。道光丙戌己酉兩年。吳下大盛。余親友患者甚衆。醫者不能深察。雜用寒涼。目擊死亡者夥矣。良由冬不藏陽。無水少雪。溫邪爲寒所束。若乘勢表散。邪從暢汗者得生。否則無有不殞命者。予亦患此症。賴陳君莘田重爲表汗。始得痧透而痊。由是潛究喉科痧症諸書。頗自致疑。後得經驗闡解一編。不著撰人姓氏。寥寥數頁。要言不煩。痾痧治法。另闢一途。足補喉科之未備。余於此症固已深知灼見矣。因考古證今。刪增闡解原文。備探要法。著爲此編。非逞臆說也。實以閱歷有年。方知此症重在發表。不在治喉。其喉科自有全書。毋庸夾雜。若乃此症四時皆有。隨時活變。總之暢汗爲第一義也。

葉天士先生爛喉痧醫案

雍正癸丑年間以來。有爛喉痧一症。發於冬春之際。不分老幼。遍相傳染。發則壯熱煩渴。痾密肌紅。宛如綿紋。咽喉疼痛腫爛。一團火熱內熾。醫家見其熱火甚也。投以犀羚芩連梔膏之類。輒至隱伏昏閉。或喉爛廢食。延挨不治。或便瀉內陷。轉

倏凶危。醫者束手。病家委之於命。孰知初起之時。頻進解肌散表。溫毒外達。多有生者。內經所謂微者逆之。甚者從之。火熱之甚。寒涼強遏。多致不救。良可慨也。

喉痧應表。如不透表。必致變端。讀此案可知。凡遇爛喉。痧痧。以得暢汗爲第一。壹要義。甘仁識。

錄爛喉寒喉經驗闡解

近年喉痧一症。日甚一日。且多殞命者。其故何也。祇緣舍本求末。重於咽喉。忽於痧子。早進寒涼。遏伏厲邪之故耳。蓋天有六氣。俱能生殺萬物。凡疾風暴雨。酷暑嚴寒。四時不正之氣。卽爲厲氣。人若感之。便能爲害。邇年天道南行。冬不藏陽。每多溫煖。及至春令。反有暴寒折伏。皆爲非時不正之厲氣。感觸者。蘊釀成病。所以其症發必一方。長幼男女相似。互爲傳染。與癘疫同。稟氣旺者。雖感重邪。其發亦輕。稟氣弱者。卽感微邪。其發亦重。夫人肺主一身之氣。肺主皮毛。脾主肌肉。肺開竅于喉鼻。鼻氣通於天氣。受邪之時。從口鼻而入於肺脾。而出於肌表。當厲毒發

作之時。熱淫之氣。浮越於肺之經隧。所以必現咽喉腫痛。鼻塞噴嚏。咳嗽胸悶。嘔  
噁。渾身痠痛等形。此非厲邪痧子爲本。咽喉咳嗽等形爲末乎。今醫不究其受病  
之因。乃執內經諸痛屬火。紅腫爲熱。急進寒涼。甚至用犀。羚。石膏。金汁。黃連等味。  
稍兼辛涼表散。以爲雙解之法。體質強旺者。幸藉元氣充足。或以敵邪致愈。稟單  
弱者。卽變音啞。喉腐。氣促。腹瀉。齒鼻流血。舌縮唇焦。膚乾無汗。發厥口噤。種種險  
候。醫家見之。猶曰病重藥輕。更以寒涼倍進。必致痧毒內陷。燔灼愈騰。喉閉痰升。  
命歸泉路。要知頭面紅腫。焮赤。正痧毒外達之勢。當此之時。需進表散開達之劑。  
寒涼清膩等藥。一味不可兼雜。使其痧從汗透。則其毒自然不留。其毒既洩。咽喉  
豈有不愈。所以先賢諸敗毒散中。皆用表散。亦同此意命名也。余非業醫者。因從  
前子女慘遭其害。爰是潛心醫學。研究歲運司天。數年以來。稍悟一斑。凡有親友  
患此症者。商治於余。皆以表散開達爲主。直待痧回腫退。鼻有清涕。遍身作寒脫  
皮。方進涼血清解之味。靡不應手速效。近見蘇杭此症盛行。殞命者不少。予仰體



上蒼好生之德。敢將一得管見。佈告四方。並非立異忌能。炫玉求售。惟冀醫林高士。藥業仁人。鑒余微忱。勿加訕詈。則患者幸甚。余亦幸甚。

此論透達。佚其姓字。誠高尚士也。所論痲痧發表清解等法。頭頭是道。於此症經驗宏富。已見一斑。滬上有某醫。以喉科著名。遇喉症。無論喉痧白喉。概以銀翹金鎖匙掛金燈等品混統治之。更加石斛沙參。吾不知其依據何法。若見此論。問心能無愧乎。甘仁識

### 論症

一凡形寒壯熱。咽喉腫痛。頭痛咳嗽胸悶。鼻塞嘔噦。兩目汪汪。手足指冷。脈來濡數。或見浮數。此卽厲邪痧症。需進後方荊防葛根湯。兩三劑。俟其暢汗。痧點透至足心。舌有楊梅刺。方進辛涼清解之味。總之痧慎於始。若有一毫胸悶未清。便是痧症未透。不可早進寒涼遏伏。以致不治。

一凡痧症欲出未出之時。宜早爲發散。以解其毒。則無餘患。若不預解。使之盡出。

或早投寒涼遏伏。多致毒蓄於中。或爲壯熱。日久枯瘁。或成驚癇。或爲瀉痢。或爲瀉痢腐爛。咳血喘促。或作浮腫疔蝕而死。此雖一時戾氣之染。然未有不由於人事之未盡也。

一凡痧疹逡巡不出者。乃風寒外束。皮膚閉密也。宜荊防葛根湯主之。外用芫荽酒。苧麻蘸酒搯之。恐露體冒風。亦可不必用。咽喉如有腫痛腐爛者。宜合玉鑰匙散頻頻吹之。

一凡形寒發熱。面若裝硃。痧不出肌。卽現上吐下瀉。腹痛如絞。甚至發厥。口噤。目閉神昏。此乃內夾濕滯。痧穢外感戾毒。暴寒折伏。表裏爲病。陰陽不通。最屬危候。每至朝發夕死。不能過二三日。若投寒涼清解。有如操刀急進。藿香正氣散。如煨葛根。牛蒡子。蟬衣。焦麩等味。一兩劑得暢汗。吐瀉厥止痛停。痧得熾赤。扶過三日。庶無妨礙。但此症吐瀉之後。津液大傷。必然發渴思冷。切忽與吞冷水。甘蔗水梨。一切寒涼之物。切忌切忌。

一凡熱邪壅於肺。逆傳於胞絡。痧疹不得出。或已出而復沒者。乃風寒所遏而然。若不早治。毒必內攻。以致喘急音啞而死。急用升麻葛根湯。加荆芥。牛蒡子。桔梗。蟬退。櫻桃核。浮萍草。枇杷葉等煎服。外用芫荽酒。苧麻蘸酒搽之。痧症復出。喘定。乃可無虞。倘體質單弱者。不能透達。需用透邪煎。或柴歸飲發之。如進二湯。仍不熾赤者。急進託裏舉斑湯。

一凡痧疹只怕不能出。若出得暢盡。其毒便解。故治痧症者。貴慎於始。發熱之時。當察時令寒熱。酌而治之。倘時令嚴寒。卽桂枝葛根湯。或麻黃湯。俱可用。勿拘辛溫遲疑。二湯內俱加入牛蒡子。蟬衣。桔梗。發之。如果熱火充熾。稍加生石膏三四錢。亦可。倘時令平和。以荆防葛根湯。加浮萍草發之。務使發得透暢。莫使其絲毫逗留。以致生變幻纏綿。痧後切忌大量海鮮。酸鹼滯辣之物。以杜後患。切囑。

論症續要

一凡服表散之劑。必得汗至足。心痹痧透。咽痛止。胸悶舒。方無餘邪。若有痧汗少。或痧現卽隱。症勢最險。或痧後重感風邪。或食新鮮發物。必有餘毒爲患。俗稱痧尾是也。痧膨。痧癩。痧癆。內外諸症百出。慎之。

一凡服事之人。最爲要緊。必須老成可靠者。終日終夜。不得倦怠。人不可脫離。以被緊蓋。出汗後。不可使露。致汗不暢。若任性貪涼。雖方藥中病。亦難奏效。蓋痧邪當發出之時。病人每悶不可耐。稍一反側於被內。使稍露以爲適意。痧點卽隱。毒從內陷。適意乃速死之道也。

一凡痧多屬於肺。陽氣從上。頭面愈多者爲吉。若餘處見。而面部不見者。名白面痧。白鼻痧。症最重。必多用升發之劑。至於痧多屬於脾。隱在皮膚之間。或成塊如雲頭而突。多起於手足身背之上。發則多癢。或麻木。是兼濕痰之故。藥宜佐以滲濕祛痰。有先見痧。後見痧。亦有痧而不痧。痧而不痧。亦有喉腐不見痧。痧者。表汗則一也。



一凡喉痧由來已久。綱目云。天行喉痧。一鄉相似。屬運氣之邪火。或寒藥下之。酸藥點之。鬱其邪於內。不得出也。正傳云。火性急速。發必暴悍。必以從治之法。甘桔荊防。加以溫藥爲導。徐徐頻與。不可頓服。切不可驟用寒涼之藥。繆仲醇曰。痧症不宜依症施治。惟當治肺。使痧症發出。則了無餘蘊矣。

一凡神昏譫語。惟當透肺邪。不宜用寒涼。即使痧回脫皮。舌紅唇燥。餘火熾盛。只須輕清洩肺爲主。是集後方藥中所不載者。明眼人當深注意。

一凡咽喉閉。毒氣歸心。胸前腫滿。氣煩促。下部洞泄不止者死。若初起咽喉。嘔吐清水。神昏譫語。目光上竄。脈濇伏。痰聲如鋸者不治。又三四日內。津涸舌光。唇齒焦黑。鼻煽口張。目無神者亦不治。

以上所論。專爲治痧痧爛喉之症。凡遇白喉。一味不可用也。臨證之際。須細辨之。

●要方備查

荆防葛根湯

葛根一錢。或錢半。牛蒡子三錢。桔梗錢半。荆芥錢半。枳壳一錢。杏仁去皮尖。三錢。便溏者勿研。生甘草四分。土貝三錢。去心研。炒防風錢半。加浮萍草三錢。防風荆芥不炒亦可。

升麻葛根湯

痧點隱隱不透者用之

升麻五分。葛根錢半。赤芍錢半。荆芥錢半。牛蒡三錢。桔梗錢半。蟬衣一錢。櫻桃核三錢。浮萍草二錢。生甘草四分。

託裏舉斑湯

升麻一錢。見點後不可用。柴胡五分。歸身五分。瀉者勿用。赤芍一錢。酒炒浮萍三錢。水炙甘草五分。原方白芷一錢。製山甲一錢。當酌用之。

蟬衣牛蒡荆芥象貝。隨症可加。惟便溏泄者。去牛蒡爲是。

透邪煎

柴歸飲與此相同加柴胡

防風 荊芥 升麻 炙草 蟬衣 牛蒡 歸身 赤芍

藿香正氣散

茅朮川朴濕重舌白膩者用

蘇葉 藿梗 桔梗 陳皮 製茅朮 厚朴 生甘草 牛蒡 茯苓 焦神

麴 半夏麴 煨葛根

申字漱喉散

元明粉七兩 雄黃三錢

右研細末。用二三錢。調入蘿蔔汁。燉溫一大碗。以毛筆蘸汁洗掃之。或漱喉。吐去老痰。如有杜牛膝打汁調和。更妙。但不可多嚥。防作瀉。

辰字探吐方

治牙關緊閉。吐藥之最靈者。真膽礬三錢。即石膽也。冬月用青魚膽。拌陰乾。研極細末。水調送下。此藥入口。無有不嘔者。一切喉腫乳蛾。吐出頑痰立鬆。如無青魚膽製者。亦可用。

一字散

豬牙皂角七錢。雄黃二錢。生礬。藜蘆各一錢。蝎尾七枚。右爲末。吹少許入鼻。卽吐痰。皂角搗爛。一味醋調入喉。四五匙亦吐。

刺法

少商穴在大指內側之端。離甲壳如韭菜許左右同。以針刺出血治喉閉。委中穴在膝蓋對後。交界縫中。治同之。

急治法

凡喉症初起。一日內。頭頂有紅點一粒。急將銀針挑破。擠出毒血。用姜水蘸桐油擦之。若過一週時。此點卽隱。



# 跋

吾鄉多醫家。利濟之功。巨大江南北。世稱孟河醫派。猶古文之有桐城陽湖繪事之傳。南宗北宗。猗歟盛矣。先伯松溪公。學醫於費晉卿前輩。得其傳。惜享年不永。未展所抱。先嚴學醫於玕塘馬紹成先生。又從馬培之先生游。內得先伯切磋。復私淑費巢諸大家。博學廣深。術益精深。視診滬上垂四十年。活人無算。其生平事蹟。婦孺亦樂道之。姑毋贅述。惟先嚴著作。如藥性輯要。脈學輯要。已刊行有年。茲刻先嚴喉痧症治概要。校讎既竟。聊記梗概於篇末。蓋喉以納氣。咽以納食。喉氣通於天。咽氣通於地。咽喉俱閉。天地之氣並塞。此咽喉症之所宜重視。而斯篇之出。爲不容緩也。

民國十六年丁卯孟冬月

次男

元彥仲英謹跋



